

宋學士全集

二



宋學士全集

(二)

宋 濂 撰

宋學士全集卷之一

明 宋 濂撰

賦

奉制撰蟠桃核賦有序

洪武乙卯夏五月丁丑上御端門召翰林詞臣出示巨桃半核蓋元內庫所藏物也其長五寸廣四寸七分前刻西王母賜漢武桃及宣和殿十字塗以金中繪龜鶴雲氣之象後鐫庚子年甲申月丁酉日記其字如前之數亦以金飾之所謂庚子實宣和二年字頗疑祐陵所書既而奉旨撰賦垂誠方來臣濂謹按王母獻桃事詳見張華博物志第八卷史補類華言桃七枚大如彈丸遺帝五自食其二以今核觀之且十倍於彈丸則其實之如斗可知矣豈華出於傳聞而想像載之歟抑其言足信而後之好事者假託傳會之歟不然漢武內傳所謂桃如鳥卵形圓而色青者又果何如歟復按蔡京所記尙方有王母蟠桃核頗鉅京嘗相祐陵其見與今相符事當可徵然則傳志所載誠有不可信者歟臣敢忘其固陋撰賦一篇俯伏丹陛以獻初則極其形容終則一歸於正其詞曰

炎漢六葉實惟武皇闡坤符握乾綱祀汾陰建竹宮叶仁獸在郊赤芝薦房西海獻續弦之膠弱水來燕卯之香慶諸福之畢集思騎龍於帝鄉幸靈桃之入口傳僊種於下方想其瑤階露寒彤庭秋迴銀燭未

掩畫屏斜映。啓承華之祕殿。眄瑤池而神騁。忽王母兮遙臨。託青鳥以傳命。鬱佳氣之葱蘢。覲芳姿之妍
 覲。於是玳席初延。霞觴屢傳。蘭辭吐兮襲人。縹袂舉兮高褰。紫雲之輜輶暫駐。九微之燈火猶燃。乃啓錦
 幃。乃濯翠筵。乃出桃實。獻於帝前。味甘醇而如醴。色含腴以不乾。鸞刀割蜜。神液流泉。上滋華池。身輕欲
 僊。將懷核而種之。斲上林之寒煙。王母微笑。塵世易遷。儻花實之並見。歲屢閱於三千。唯紫府之列眞。視
 滄海於桑田。彼窺烏牖之小兒。尙奚測夫幽玄。斯核也。匪鑄而成。非陶而凝。藉五行之亭毒。資六氣以流
 形。鄙瓠犀之脆薄。並玉質之堅貞。瓜之不入。叩則有聲。知何年之中析。存半壁之晶瑩。俯貼金盤。巢蓮之
 龜藏六。仰承玉露。常滿之梧弗傾。銳首聳兮尖岑。豐下橢兮墜星。衆鉞蹙背文之籀。一窻暈面色之頰。荷
 盤欲展。蚌甲未扃。藏仁之跡猶在。含肌之罅如生。兩肉好之隱約。圍合線之交層。龜鶴軒翥兮顯象。寶章
 絢爛兮金明。鳳卣鸞彝。同藏珍於天府。星形月魄。挾灝氣於蓬瀛。嗟夫。自昔仙靈。惚恍難憑。出無入有。變
 幻莫停。橘類盤兮巴園。棗如瓜兮漢庭。恣燕齊之方士。騁詭辨之奔騰。瞻雲路之咫尺。恨凡骨之難登。以
 雄才之蓋世。甘昏溺而不醒。至若建章月淡。甘泉風冷。銅莖中峙。仙掌高擎。望鸞輪兮不來。徒馳情於窈
 冥。苦白日之易短兮。竟莫制於頽齡。核雖存而人則逝兮。悲秋風於茂陵。矧宣和之繼軌兮。慕鼎湖之龍
 升。託青華之帝子。設神霄之玄稱。何殷鑒之不遠。踵覆轍其相仍。天啓皇明。眞人龍興。順堪輿之大化。調
 陰陽之至精。道德行兮。卽龍虎之丹顯。忠信昭兮。勝鉛汞之功弘。以九州爲仁壽之域。儕兆民於喬松之
 朋。神機流浹。太和熏蒸。指佞人兮草生屈軼。齊氣朔兮階秀堯莫。視區區之遺核。初何繫乎重輕。此所以

革往古之荒唐。法唐虞以作程也。評曰。桃有核兮大逾掌。歷千齡兮多惚恍。慨靈仙兮勞夢思。誰見崑丘兮紫芝長。真人出兮海寓甯。禮樂爲冠兮仁義作纓。簫韶九成兮鳳凰鳴。青鳥不敢徠兮幻說清。千秋萬歲兮永長生。

竊記徽宗本紀。宣和元年己亥二月庚辰改元。遂易宣和殿爲保和殿。至四年壬寅夏四月丙午。詔錄三館書置宣和殿。及太清樓祕閣。始重稱宣和。今殿上之字刻於二年庚子之甲申月。乃不書保。而猶襲宣和之名。此固不可不疑。况丁酉日屬庚子歲癸未月之終。今復隸之於甲申月之首。尤有不可得而致詰者。頗意此核非漢武時物。字亦非宋祐陵所書。雜書所載海外之國多大桃。雖不可盡信。或者得其遺核。特依倣而託之者歟。然濂年已邁。舊學皆廢忘。未必其言之足徵也。姑書之於此。以俟後之君子云。

崆峒雪樵賦有序

劉君宗弼。家贛之空同山陽。學贍而文雄。嘗擢進士第。入教成均。出任浙江。部使者之寄聲光已赫然矣。君乃退然弗居。方以崆峒雪樵自號。其殆顯幽一致者歟。非賢而有德者。蓋弗能也。君間請濂賦其事。雕蟲篆刻之學。老且忘去。詎勉操觚。雖用賦體。而比物成義爲多。君之西還。或歌於清泉白石間。山靈聞之。未必不輟然一笑也。其辭曰。

伊崆峒之拔起兮。鎮嶠南之靈區。翠旂繽其蕩空兮。播灝氣之蕤綏。章貢挾以北流兮。盎土脉之滋腴。穴

遙通於龍翁兮。勢蟠亘於鬱孤。信地維之奧宅兮。爲靈真之所都。則有白鵝羽人。黃唐丹士。闢玉爲房。鑄金成黍。仰青帝以布帷。撥赤霞而啓筭。悼下土之盆濁。凌剛風以逕度。惟彭城之僊子兮。式爛柯之遺軌。謂靈奕之可觀兮。意翩翩而遐舉。裘翦鹿脫之花。屢約芝田之蕊。巾割湘雲之枝。繫點彩鶴之尾。傷胡麻之未飯。愛白石之堪煮。踰洞真之石扉。借修月之寶斧。期緱笙之下臨兮。庶綠文之可授。於時玄冬屆朔。氣交水腹。堅金莖高。二鶴夜語。獨烏晝輶。莽六花之聚白。合溟滓於空寥。幻九清之秘景。闢太素之神苞。奪人目精兮。若流汞翻空而不定。一白無地兮。如爛銀炫耀於霜臬。瓊林玉樹。疊顯聯條。柯頓亡於春綠。驚巧綴於晴梢。乃陟瑤磴。乃依冰樾。膚中寒而生鱗。指屢僵而弗屈。丁丁許許。不遺餘力。已枯成采。方長不折。玉屑隨聲而輕墮。霜莖倚雲而初積。束以九真之赤藤。附以千年之蒼魄。旣逍遙而永歸。忘蕉鹿於今昔。歌曰。我采我樵兮。大濛之野。萬樹瓏璚兮。玉光照夜。孰能相從兮。與霓旌而俱下。於是築石竈。繙金經。養神火。煉黃甯。永生水。虎之窟。鉛出火。龍之肩。液承太乙之珠。機運元華之精。憑乾坤之卦券。植鄴鄂之丹城。逮伐毛而洗髓。致陰爍而陽凝。種芝於瓊玉之山。折桂於廣寒之庭。領衿佩於橋門。集鸛鷺於王庭。白簡霜飛。繡衣春明。近一山而持斧。使九夏之生冰。迺乘風而來歸兮。於瀛洲之先登。隔人間之風雨兮。遽眞凡之異程。至若西鄰之子。沈酣羶葷。屏龜香曙。笙火花春。葆階舞楚。銀館歌秦。黃塵迷南華之夢。弊屣嗤東郭之貧。樂鍾鼎之遺豔。厭煙霞之近醇。尙父釣渭。阿衡耕莘。或封齊於東海。或致君於華助。齊出處於一塗。肯變志於屈伸。世緒紛兮。麗以新蠟。代薪兮。傷芳辰。翻海水以爲霖兮。曾莫濯夫游塵。孰不

化爲胡燕兮。依華棖之飛文。丹禽鳴夫空谷兮。亦寥寥之一聞。彈樵歌之逸響兮。寄綠綺於秋旻。歌曰。若有人兮。在蘭厓止。白虎爲使。陟崇巘止。皓蟲迴飈。敷天葩止。虛白內朗。絕纖瑕止。仁斧義戕。龍鏘鳴止。鵜膏匪施。痾弗形止。翦彼薪樗。扶松柏止。養賢大鼎。熟以烹止。天下爲公。大道行止。遡風屹立。思盈盈止。

頌

平江漢頌

天命皇上爲億兆生民主。旌麾所向。悉臣悉庭。初以一旅之師。興濠泗間。遂撫淮南。平江東。攻浙東西下之。版圖所入。方數千里。定都江左。發政施仁。戴白之叟。垂髻之童。涵泳至化。皞皞熙熙。如承平時。於時陳友諒據有江漢之地。僭居大號。賊殺其主。飭修蒙衝。虐驅烝黎。如蹈水火。不自度力。又集蜂蟻之衆。直窺豫章。三月不解。皇赫斯怒。乃召羣臣於庭而告之曰。陳寇不道。敢屢予侮。昔者蕩搖我邊方。侵軼我姑孰。恥慶切。伺偵候也。我金陵賴爾一二臣鄰之力。攻而敗之。予亦親覆其穴巢。中宵竄走。假息武昌。予不忍追殲之。冀其悔禍。以自逭於天刑。癸卯之夏。乃復圍我豫章。是其凶德無厭。自取殄滅。此天亡之時。天之明威。予不敢不順。唯爾熊羆之臣。不二心之士。尙弼予以成厥功。羣臣曰。都於是。右丞臣達。參知政事臣遇春。帳前親兵都指揮使臣國勝。同知樞密院事臣永忠。臣通海。備厥戎器。簡厥師徒以俟。七月癸酉。上躬擐甲冑。師祭。禡龍江。帥樓船數百。蔽江而上。陳寇大驚。解圍而逃。丁亥。與我師遇鄱陽湖之康郎山。戊子。上分舟師爲十二屯。命達遇春永忠突入寇陣。呼聲動天地。矢鋒雨集。砲聲雷鑄。波濤起立。飛火照耀。百

里之內。水色盡赤。焚溺死者。動一二萬。流屍如蟻。滿望無際。己丑。焚僞平章舟。刈戮餘二千。辛卯。復酣戰。寇將張定邊。素號梟猛。上親禦之。將士皆死戰。歷一二時。遇春等左右夾擊。殺士卒無算。張中矢百餘。而退潛保鞋山。不敢吐氣。我師亦移據湖口。扼彼喉衿。列柵南北江岸。置火筏中流。水陸嚴戒。以候其發。八月。寇食盡。遣舟五百艘。掠糧都昌。又爲我大將所獲。壬戌。寇計窮。冒死突出。將上趨九江。上命諸將一時俱合兵大戰。如戊子。自辰達酉。督戰益急。友諒中飛矢。斃於舟中。癸亥。降其衆五萬。上命釋之。不戮一人。凱歌而旋。舳艫相銜。旌旗飛翩。不疾不徐。委蛇而來。萬姓歡迎。俯伏道左。山川草木。皆有喜色。告廟飲至。行賞論功。賜遇春田若干。永忠田若干。其餘將士。費金繒有差。臣稽在昔。曹操治水軍八十萬。來攻孫權。而周瑜黃蓋敗之於赤壁。苻堅發長安戎卒六十餘萬。騎二十七萬。以侵晉。而謝玄謝石敗之於淝水。然赤壁不過一焚而走。淝水亦不過軍亂而奔。初未嘗大戰也。而史臣具書之。以爲千古美談。矧今湖口之捷。血戰累日。天地爲之晦冥。日月爲之無光。山河爲之震盪。其神功駿烈。炳耀鏗鏘。與天無極。較之二國。未足多讓。而歌咏不作。非甚闕典歟。臣謹備著其事。撰爲頌詞一通。以流鴻績於無窮。以俟太史氏之采錄云。其詞曰。天眷有德。實惟哲皇。肆其神畧。以靖寇攘。義旄東指。罔敢弗恭。風烈虎嘯。雲游龍驤。長淮旣歸。江左攸屬。浙之東西。樹侯置牧。乃建國家。以奠南服。以懷中原。以控西蜀。蠢爾小醜。敢讎大邦。集其兇頑。鋒鋸斧螳。輕涉我疆。以跳以踉。亦旣翦劉。僵骸覆江。游齊六軍。直傾其穴。釋而勿誅。俾自懲刷。盍胡不然。復豕而咥。翹其蟲臂。當吾車轍。皇用震怒。歷告在廷。是決不悛。命將往征。爾選舟師。爾整甲兵。漕爾糗

糧各罄爾誠。搖光在中。夷則之月。禡牙江濱。皇秉巨鉞。以誓以誠。以速其發。紀律精明。颶火奮激。旛旐揚揚。鋒切漢江。艘將將。矛戈洸洸。鎧冑明明。載怒載厲。載飛載颺。雄威所吞。已無荆湘。既與寇逢。大呼衝擊。藥騰藜礲。星流火戟。虐燄電奔。巨轟雷劈。殺氣冥蒙。不辨咫尺。矢鋒所貫。什伍聯聯。縱橫交紐。命隕弗顛。攢桅湊颿。箛束蟬編。流尸塞川。舟行弗前。寇魄旣褫。扶創而逸。聚於湖奧。僅存喘息。我方植柵。江之南北。火筏在流。掩蔽如翼。越歷四旬。飛走途窮。將冒萬死。以絕其衝。我師見之。千艘如龍。似兔之走。而鷹之從。酣戰六時。由辰達酉。僕姑一發。殪此酋首。貫睛及顙。仆若枯柳。大憝旣除。餘不能醜。遞相告言。我誠不振。我革我頑。我歸至仁。誰謂培塿。可高嶙峋。再拜稽首。來降來臣。皇曰俞哉。汝俘予受。宥汝弗劉。予汝父母。汝凍予衣。汝饑予哺。昔何昏迷。今始撤蔀。奏凱而旋。騎吹鬱搖。形於樂歌。節以錫饒。飲至於廟。頒賞於朝。帛堆其家。肉登其庖。都人聚觀。舉手加額。或歎或謠。有聲嘖嘖。干戈相尋。匪一朝夕。自今昇平。可坐而策。惟皇神武。動則克之。羣策盡屈。四方式之。惟皇寬慈。降則釋之。義聲動盪。疇能敵之。惟皇明斷。遇事卽決。洞見千里。不隔一髮。所以四征。成此駿烈。小大畢朝。孰敢肆孽。在昔赤壁。泊乎合淝。事以幸集。尙傳策書。况茲之功。俊偉赫熹。揆古無讓。可無詠詩。臣雖微賤。文字是職。對揚皇休。并獻臣臆。三代以還。用仁興國。皇宜遵行。永作民極。

膏露頌

洪武二年冬十月。十有三日甲戌。膏露降於乾清宮後苑蒼松之上。皇帝敕中官折示禁林諸臣。光潤如

酒凝結如珠。肪白飴甘。彌布松柯。霽烈之氣。鬯達左右。勃鬱淋漓。薰涵太酥。天休震動。中外嘆嗟。又明日丙子。上御外朝。左丞相宣國公臣善長。帥羣臣稱賀。上若曰。甘露之降。載在往牒。然休咎之徵。當以類應。朕惡足以致斯。卿等尙明爲朕言之。參知政事臣稼對曰。聖人之德。上及太清。下及太甯。中及萬靈。則膏露呈瑞。陛下敬恭天地。輯和人民。故天不愛道。而嘉祥徽顯也。起居注臣觀對曰。帝王恩及於物。順於人。而甘露降。陛下誕寬民賦。衆庶驩豫。底於救甯。神應之臻。職此故也。翰林侍講學士臣素對曰。王者敬養耆老。則甘露降。而松栢受之。尊賢容衆。則竹葦受之。今露降於松。則陛下養老之所致也。宜以制幣策告宗廟。頒於史館。以永億萬年無疆之聞。上情存損挹。皆推而不居。言旣已。丞相帥其班以退。翰林學士臣濂竊伏自念。氏北有星名爲天乳。若明而潤。則膏露下焉。王者德格於上。恩覃於下。靈氛充牣。祕貺斯甄。此天人感應之常理也。欽惟皇上。興自臨濠。匹馬渡江。十五年間。遂成帝業。天瑞育滋。不一而足。彩霞成鳳。卿雲聚繡。赤鳥飛翔。白兔俯伏。瑞蓮並蓂。嘉禾孕文。實皆天之所命。非人力所致。而自至者。今又覩茲聖徵。則其德洞淪冥。功成不宰。三瑞沓至。千休滋彰。有不期然而然者矣。雖然。傳有之。受命不於天。於其人。休符不於祥。於其仁。所以孔子之作春秋。祥瑞不書。而有年則書。豈不以天道玄遠難知。而人事之爲可徵者乎。皇上以天縱之聖。留神至治。以得仁賢爲瑞。以五風十雨爲祥。視彼前代。植金莖以承液。夸嘉瑞以紀年者。未嘗不指以爲戒。則其英明之識。超絕之智。卓冠百王。爲法萬世。是宜美盛德之形容。播諸樂歌。被之管絃。以示聖子神孫。於無窮云。其辭曰。上天降康。甘露之瀼。於粲其英。純乾發自陽。以布於下。

方凝於休祥。其祥伊何。靈氣孔多。有甘者液。載仁惟澤。潛靈是錫。誕啓皇之德。天地相合。鴻休翕集。厭厭
渴渴。紛紛密密。匪隨日以食。兆厥聖徵。如卿之雲。如景之星。如日之重輪。沖和氤氲。以文我太平。惟皇之
聖。貞符自應。不卑而泳。不高而迎。菲祿之攸盛。惟皇之明。貞符爾承。不欹而傾。不汰而盈。菲祿之攸甯。休
慶之卽。四國之式。有濯厥聲。耀於千齡。

嘉瓜頌

皇明式於九圍。德漸仁被。和氣薰蒸。靈物效祥。乃洪武五年夏六月。嘉瓜生於句容張觀之園。雙實同蒂。
圓如合璧。奇姿分輝。紺色交潤。誠爲曠世之產。壬寅京尹臣遇林函以素匱圖其形於上。移文儀曹請以
奏聞。癸卯尙書臣凱等奉瓜以獻。時上御武樓。中書右丞相臣廣洋。左丞臣庸。同知大都督府事臣英。御
史中丞臣甯。翰林學士臣濂。咸侍左右。天顏怡愉。重瞳屢回。良久乃言曰。徵之往牒。其事云何。丞相奏言。
漢元和中嘉瓜生於郡國。唐汴州亦獻嘉瓜。禎祥之應。有自來矣。陛下勵精圖治。超漢軼唐。故天錫之珍
符。太平有象。實見於茲。上謙讓弗居。然而靈貺之臻。復不可不承。乃詔內臣實諸乾清宮。翌日甲辰。薦諸
太廟。臣濂退而思之。夫瓜。刀果切。草實在地生。之屬也。其蔓遠引。其葉阜蕃。諸傳有之。神瓜合形。表縣縣之慶。此
固兆聖子神孫享億萬載無疆之祉。況瓜之所出。本於回紇。中國討而獲之。故名爲西方。今皇上命大將
軍統師西征。甘肅西涼諸郡俱下。而瓜沙已入職方。行見西域三十六國。同心來朝。駢肩入貢。大顯叶瑞。
其又不在於茲乎。然而異畝同穎。周公作嘉禾之篇。三秀合圖。班氏有靈芝之歌。矧此嘉植。含滋發馨。昭

宣我神應。焜煌我王度。甯可暗。

於金於甘二切
啼極無聲

默而遂已乎。願臣驚劣。不足以美盛德之形容。謹上其事。願

宣付史館。以備實錄。復繫之以頌。頌曰。乾道載清。坤維用甯。保合太和。發爲休禎。句容之墟。物無疵癘。神

瓜挺出。殊實同蒂。瓜孰非單。此合而生。二氣毓質。雙星降精。蜜房均甘。冰圭競爽。明月重輪。彷彿堪象。豈

無寶連。產於戶東。叶。嶧若茲瓜。協瑞聯祥。亦有華平。張翠作蓋。嶧若茲瓜。交輝映彩。其兆伊何。羅圖縣延。

西域既柔。德冒八埏。羣臣曰都。載拜稽首。神休滋彰。天子萬壽。粵從啓運。靈貺疊甄。兩歧秀麥。合枌方無切

花夢孕蓮。矧此貞符。近在瑩穀。王化自邇。遠無不服。帝曰吁哉。朕猶慊然。瑞當在人物。胡得專使物爲祥。

宜獻清廟。自我先人。積慶所召。孰瑞不矜。帝則弗居。唯親是思。我民之圖。以實應天。斯乃盛德。小臣作頌。以示罔極。

鳳陽府新鑄大鐘頌

皇帝既正大統。建都江表。德綏威讐。萬邦咸臣。用羣臣奏臨濠爲龍飛之地。賜名曰鳳陽。南北民人和會。百族錯居。動十萬數。然而物大而盛。不假器齊一之。無以嚴昏旦之禁。乃詔江陰侯吳良監鑄大鐘。以定衆志。以裨治化。侯既受詔。遣使者至富春山中徵金。工何成。諭以天子明命。即日帥其屬十六人以從。相地鳳陽城東三里。搏泥成範。畫其鑠銑角衡之度。侈彛爲良。篆帶以方。候其燥剛。始穿治一十又三。鍊青赤銅六萬五千斤。筮以洪武乙卯冬十一月己巳涖事。厥明。侯具法服。以牛一羊一豕一。祝告先治之神。禮既成。橐籥咸興。鼓動風氣。炎光赫曦。上貫霄漢。絳液既澄。氣噴雲洩。循竇而入。肅肅有聲。陽施陰凝。勁

質斯具。越二日辛未乃發。復取牲血塗其豐隙。以厭除不祥。鐘高十六尺有五寸。厚六寸。徑十尺有五寸。圍三十四尺有奇。混融其輪圓。煒燐其容輝。信技殫於人。巧妙奪於神功者也。於是營構層臺。副以簏簾。聚千夫之力。曳鉅絙而登之。一杵之撞。隱隱闐闐。雷旋電奔。震撼太虛。遐邇聞者。靡不聳愕。會濂扈從青宮。幸鳳陽。親觀盛美。侯遂請濂爲之頌。濂聞先王之世。金部有七。黃鐘乃樂之所自出。而景鐘又爲黃鐘之本。所謂景鐘。大鐘也。其受至於九斛而止。律呂由是而應。陰陽由是而均。夫豈細故也哉。秦漢以來。寢失古法。小鐘或數尺。大鐘或容千石。皆不本於律度。今我熙朝稽古右文。定於中制。宣導天地。孚洽神人。中和所致。嘉瑞畢協。增拓化原。亦於是乎有賴。非特嚴昏旦之禁而已。濂待罪國史。以文辭爲職業。義當發揚蹈厲。以鳴國家之盛。侯之有請。不敢固辭。頌曰。維天穆清。鼓以雷霆。適昭天聲。百物以生。維帝濬哲。法天之烈。大鏞斯揭。元氣噴洩。睠於濛梁。真龍飛翔。乘陰御陽。洗濯八荒。神物攸起。是爲帝里。從者如雨。於焉萃止。物大而豐。往來憧憧。節之以鏞。罔敢弗恭。乃飭鳧氏。乃具爐錘。乃烹乃鑿。化金爲水。赤氣夜明。如日之升。流函而赅。入寶有聲。彬彬斐斐。功同神鬼。不鈕不銛。輪圓順軌。旣啓其型。敢愛斯牲。塗饗禮成。榮光如星。千夫齊力。臺構懸植。交扛孔甕。載考載擊。宅兮困困。觸兮賁賁。摩乾盪坤。以警昕昏。發攄靈氣。昭融品彙。物無疵癘。年穀攸遂。博碩而龐。聲與政通。拓美集祥。熏於家邦。惟皇建極。福之敷錫。制器有赫。式和民則。稽樂之原。鐘實爲先。律呂以宣。功垂不刊。小臣作頌。有美無諷。爰咨於衆。是傳是誦。

擬晉武帝武功頌

惟咸甯五年冬十有一月。皇帝將舉兵徂征。乃集多士於庭而訓之曰。惟皇天孚佑有晉。俾克君臨萬方。爾萬方有衆。罔敢有肆厥志。朕猶夙夜祗懼。若將墜於深淵。唯恐一夫不獲。以越前王赫憲。商書曰。民非后罔克胥匡以生。后非民罔以辟四方。朕曷敢荒甯。今孫氏皓舍我民弗靖。唯酒醴色淫。酗無厭。大開苑囿。起土山樓觀。殫極工藝。肆厥威如虎狼。羣臣有正視者。輒殺無赦。人怨神怒。皓有耳若罔聞知。則亦弗畏。天降威命。上帝震怒。集厥命於朕躬。不敢不正。敢用吉玉宣璧。昭告於上天神后。帥爾有衆。底天之罰。爾伸。爾爲王子國之休戚。與爾同之。爾督徐州諸軍。以出涂中。爾渾。戮力王室。簡在朕心。爾督揚州諸軍。以出大江之西。爾預。夙以嘉謨告朕。朕極不忘。爾尙克踐前言。以成厥勳。荊州諸軍。爾其督之。以出江陵。爾濬。爾作大艦。欲有事於皓。多歷年所。今維其時。非爾弗克終厥岡。益梁諸軍。爾其監之。以下巴蜀。爾彬。帥其部曲以從。爾奮。爾戎。世號忠貞。各將爾師。以出夏口。以出武昌。爾充。爲使持節。假黃鉞。大都督。以冠軍。爾濟。副之。嗚呼。爾有衆。修乃干戈。峙乃糗糧。齊乃卒伍。勿喪厥紀律。惟爾賢。往敷朕威靈。越厥君臣。宜執俘之。獻於大廟。勿大肆殺戮。惟爾賢。嗚呼。朕豈有愛於皓士疆。閱我民罹辜。誕以爾多方。殄殲乃讎。爾尙兢兢懷保。若撫轂雛。兵戎所指。弗使致厥傷。俾朕膏澤布於下民。時乃功。爾不聽朕言。朕則孥戮女。爾其念哉。太康九年春。安東將軍渾。出橫江。所向皆克。二月。龍驤將軍濬。克西陵。鎮南大將軍預。遣將渡江。自進克江陵。沅湘以南諸郡。皆望風送印綬。預分兵益濬。建威將軍戎。遣將與濬合攻武昌。降之。三月。濬以舟師入石頭。皓面縛輿櫬詣軍門降。克州四郡四十三戶五十二萬三千兵二十三萬。夏四月。賜皓爵。

歸命侯遣使行荆楊除皓苛政詔增充渾邑八千戶進渾爵爲公濬輔國大將軍預戎皆封縣侯諸將賞賜有差以伐皓之役實始於鉅平侯祐祐旣卒策告其廟封其夫人爲萬歲鄉君食邑五千戶復詔博士臣某刻石紀功昭示萬世子孫以紹有晉無窮之基弗敢壞頌曰煌煌有晉寵綏下民欲俾萬方均囿至仁惟皓不恭據彼海瀕殘虐是逞若火四焚帝怒斯赫命將徂征龍盾虎旗照耀日星士氣如虹吞厥南土長江天塹一朝飛渡罔不震驚流汗浹背豈伊神武自天而墜帝命將臣汝戒汝師汝敵則劉降宜舍之皓旣而縛餘敢不釋萬里雖遠天威咫尺青蓋委蛇入於洛中夙發其祥昭此武功皇華載遣六轡耳耳誕布陽和以消陰疇旋乾轉坤六合一家文恬武嬉渾渾無涯有功者賞載勝載錫赤芾桓圭帝不之惜惟帝神武能屈羣策拓開蠻荒揭此日月帝德流衍頌聲斯播授之樂師以薦郊廟

擬薛收上秦王平夏鄭頌

粵武德四年秋七月朔記室薛收頓首再拜言仰惟秦王殿下龍興晉陽佐我皇帝起義兵以戡定禍亂金鼓一振罔不臣順唯鄭王世充夏王建德昧厥大命侵牟我邊陲刈劉我烝人鈔掠我玉帛干戈之相尋殆非一朝一夕皇帝震怒詔王督諸軍伐鄭遂敗世充於穀水進圍洛陽建德不思自靖凶德參會將兵十萬來救王率諸將酣戰破而擒之於是世充智窮援絕率羣臣詣軍門降王至長安獻俘於太廟行飲至禮詔斬建德於市免世充爲庶人徙於蜀中大赦天下天下萬姓驩欣舞抃以爲皇帝之睿謨雄算王之戎功駿烈皦皦乎不可尙已收備在戎行親瞻制勝料敵之奇進退擊刺之雄耳目怖駭若臨鬼神

雖淺劣無識。不可無歌詩以鋪張鴻休。謹撰平夏鄭頌一通以獻。庶幾昭示萬世。以宣有唐之聲烈。以著王業之艱難云。其辭曰。眞主挺生。宅靈孕奇。天日之表。龍鳳之姿。嘯陽吹陰。宰於化機。精神所被。物無不綏。皇帝興兵。以遏亂隋。王左右之神。運天施。或獻奇謀。食若元龜。或賈拳勇。力如虎貔。雄吞八極。易若拾遺。如鼓迅颺。決決四來。降燕帖魏。踣秦以隳。金鼓之下。孰能慢台。維此二豎。曰夏暨鄭。據河南北。兵犀弓勁。勢成鼎足。力與我競。夏陷黎陽。思百其勝。衛滑齊兗。蹂踐莫定。鄭取汴毫。奪我藩屏。封豕長蛇。貪噬益橫。况於官城。大設坑穽。四周削起。峻若甌甌。忘則陷之。毀宗滅姓。怨氣塞天。凝爲祥告。人之孔哀。其何能竟。皇帝曰嗟。我人何辜。敕汝秦王。汝亟是圖。汝救汝甲。汝張汝弧。汝簡銳驍。東傳其都。王拜稽首。禡牙出徂。旌旄飛翻。士卒嘯呼。曰爾萬寶。爾疾而趨。扼其龍門。毋道寇誅。曰爾德威。視敵若無。圍厥河內。批其大輒。曰爾君廓。爾震鼓桴。控彼洛口。以絕餉輸。屢戰屢克。王乃向洛。移軍青城。壁壘星錯。寇薄穀水。楸以虎落。王曰爾通。爾急往角。我引騎南。以褫其魄。靈威莫抗。寇漸退却。橫戟長追。如風入囊。掘塹而守。朝鼓夕柝。不日成擒。以潤鼎鑊。洪爐熾炭。何金不鑠。夏人卒狂。稱兵黨惡。其旅若林。誠可怖愕。王曰靖哉。爾衆勿搖。寇卒旣惰。寇將且驕。寇命當傾。決於今朝。莫匪上天。欲逸我勞。使發一矢。中此兩鵠。咽喉之門。實在虎牢。吾往敎之。短兵爾操。且行且餌。伏銳於坳。伺寇深入。乃與死膠。寇因大讐。布屍滿皋。進退維谷。更動疊騷。偵吾牧馬。將襲而逃。王乃濟河。南臨廣武。驟馳如雲。留彼弗取。寇果來迎。列柵牛口。我閉弗出。自辰達午。寇氣旣退。謁蹶欲走。王謂士及。爾整部伍。爾將梟騎。突此羣醜。矛進而翼。截其兩肘。會寇方朝。顛倒失

序震靈方驚不及掩耳。擊刺從衡。龍飛熊吼。天日爲黃。塵起如霧。正戰方酣。王出以奇。爾知節等卷旆而馳。旁繞寇陣。張我虎旗。寇衆惶駭。奔如流澌。相彼酋首。欲絕而西。神槩一指。顛若墜尸。王叱武威。執而縛之。因示鄭人。鄭人曰噫。我援已絕。我力莫支。我肉我祖。牽羊以隨。有餘者孽。亦復來歸。奉璽再拜。冀免殲夷。乃獲乃俘。振旅而復。王被金甲。懸厥魚服。遠而望之。有光熠煜。大將森衛。後先聯屬。鐵騎萬匹。旁障羽。纛鼓吹。颯沓。節以金鐐。清廟有赫。上與雲蟲。陳俎奠爵。籩豆嘉肅。既俘以獻。且拜且祝。祝已飲至。列筵如竹。醇醑川流。精殺林簇。鳧鷖既醉。咏歌相續。皇帝曰嗟。寶實弗恭。稔禍濟惡。厥父用亢。當梟其元。以令醜兇。充罪固殷。悉衆禦攻。待以不死。徙賓蜀邦。我人實煩。轉輸是共。或居遐裔。久阻寇封。惴惴自保。息屏足重。宜行給復。式寬其庸。復赦宇內。以示大同。丹鳳銜詔。無遠不通。弘宣容澤。丕昭仁功。萬方有言。如郝斯撒。昔也戰爭。連城蹀血。蒿萊千里。人跡殆絕。今也恬嬉。寧爾家室。盡歛戈矛。化爲耨耨。人和既滋。天休當發。山出器車。庖形瑞蓮。騶虞在郊。苞鳳巢穴。黃龍舒采。白鳥振潔。無間朔南。聲教孚浹。視彼梁楚。千鈞一髮。定知來朝。不煩斧鉞。天生烝人。下代儉囊。必眷有德。以綏以攘。簡策所紀。更僕莫終。徵之秦漢。厥事孔明。羸政肆虐。虎視域中。踐華因河。爲固自防。祠狐一鳴。亂如沸羹。六國復興。各自立王。籍起會稽。中號最強。暗噫叱咤。萬夫膽喪。劉季斬之。如縛豺狼。鉅敵一鋤。寰宇仍康。強隋比秦。尤瀆天紀。諸桀援戈。聚如蜂蟻。不有靖之。代何能治。惟帝明容。乘運而起。惟王輔之。以臨四海。黃鉞白旄。翦薙不軌。無堅不破。無險弗砥。夏鄭既夷。治平可致。揆之炎漢。聯芳儷美。赫赫神功。可昭萬祀。收在戎行。躬瞻鴻偉。敢揚頌辭。以告太

史。

豫章鐵柱頌

豫章郡鐵柱二。旌陽令南昌許遜敬之。鑄以鎮蛟者也。郡地濱於江。水蟲騁妖。故民多江禍。旌陽與西安吳猛世雲用正一斬邪三五飛步之術。追殲其神於長沙。復懼遺孽。游興使物治鐵厭其窟宅。一在西山雙嶺南。湮沒已久。一在牙城南井。迄今猶存。柱出井外。勵尺下施八索。謂能鉤鎖地脉云。唐咸通六年。節度使嚴譔來爲郡將。發視之。未及咫。烈風雷雨。江水暴溢。譔恐而止。其見於道家書者如此。濂竊聞之。周有壺涿氏。掌取水蟲。若欲殺其神。則以牡犢牛貫象齒而沈之。則其神死。淵爲陵神。謂龍罔象之屬也。古蓋有其術矣。矧單陽則飛制以重陰。乃伏而不動。鐵陰而蛟陽者也。斯柱之建。其亦沈犢象之遺意與。於戲。豫章之民與蛟不兩立。徵旌陽西安民其魚矣。濂雖不敏。謹徇郡守某之請。勒文柱下。以頌神功於億萬載。頌曰。吳楚合域。翼軫分經。南昌鉅都。蛟孽所庭。味攪波譎。雁運濤縈。夫諸獸驗。勝遇禽徵。沈竈鼃產。蝕阜泓成。靈伯應歷。鬼憲宣刑。嶽籙三辰。斗劍七星。揮斥電戰。剗割靈升。河告黑靡。川液紅星。軌天設鎮。冶金建楹。祝融主饒。閼伯司型。八神錫羨。五官儲精。上旋圓樞。下鋌方局。溟妃捧鑑。淵后持衡。鸞笙鶴瀨。月吹鳬汀。仙旂週紫。童節流青。玄勳潛湧。素牒晶瑩。龜山鐵絙。龍鼎文銘。翊扶鴻宰。幹運清寧。泰山可礪。靈柱弗傾。

三老圖頌

浦江鄭氏以孝弟爲政。一門五十餘室。不別槃案而飯者。垂三百年。靈和充牣。發爲祥徵。三壽作朋。形於同氣。孟曰。伯陽父年七十有二。叔曰仲德父。年視孟而縮其四。季曰仲舒父。年比叔又劣其五。惟是三老人者。身載明德。聿昭前聞。天休滋錫。精神熙康。羣從子姓。趨翼乎後先。仁聲義聞。流衍於倫類。誠可謂備享百福而綏有遐齡者矣。濂竊聞之。南極有老人之星。古者謂其光明潤則下多壽考。是則天人之間。氣化孚浹。同流上下。閱世靈長。似若不然者。況於孝弟之家。通於神明者乎。宜其人瑞之鼎立。景貺之川臻也。濂也不敏。覽圖興嗟。斯頌之所由作。其辭曰。維天降康。其福穰穰。斯壽之祥。其祥何徵。非星之景。非雲之卿。非三秀之榮。鍾我壽朋。大冠緇衣。載肅其儀。其神孔熙。其樂孔皆。燕居之耽。時盍其簪。如鼎之安。如星之參。協數於三。孰不式且瞻。旌門有恤。孫子之飭。有百斯集。雅雅魚魚。振振蟄蟄。或馮或翼。弗徐弗亟。唯步武是式。歲時宴饗。肆筵於堂。邊豆大房。曰殺羔羊。其醪苾芳。鐘鼓嚶嚶。笙簧洋洋。多士鏘鏘。更獻壽觴。祝鯁於前。執醕於旁。人士來觀。有嘆有言。維此旌門。德義之尊。維此壽朋。景福攸臻。積之既蕃。受之弗諼。錫羨於後昆。其羨之都。孰侈孰舒。孰形匪圖。古亦有諸。其年曰耆。或至於期頤。是繪是慕。儷美而同趨。九藍之山。有石巖巖。白鱗之水。其流泮泮。眉壽無有害。與之同體。壽俊之良。髮素而眉龐。菲祿具慶。叶流榮於鄉。匪榮於鄉。實邦家之光。洪武十年七月望日。前具官宋濂述。

詔

奉制諭安南國詔

春秋大義。亂臣賊子在王法之所必誅。不以裔夏而有間也。向者安南國王陳日烱薨。我國家賜以璽書。而立日賢爲王。今觀所上表章。乃名叔明。詢諸使者。日賢爲盜所逼。悉自翦屠其羽翼。身亦就斃。此皆爾叔明造計傾之。而成篡奪之禍也。揆於大義。必討無赦。如或更弦改轍。擇日賢親賢命而立之。庶幾可贖前罪。不然。十萬大軍水陸俱進。正名致討。以昭示四裔。爾其毋悔。

誥

給事中安統除兵部尙書誥

兵部司馬之職。尙書法從之官。古不輕授。今難其人。蓋戎務之出入。馬政之弛張。莫不繫焉。非有奮厲之才。練達之知。不足以奉揚威武。毘贊機密者矣。具官安某。粵自蚤歲。有志事功。自北而南。在朕左右。及其給事內廷。論思獻納之益。亦時有焉。夏官之選。惟爾之能。然以八座之貴。朕非輕以畀人者也。爾尙一乃心力。以報朕所以見知之意。嗚呼。惟秉義守正。則可以謹科條。惟趨事赴功。則可以行邦政。尙思自勉。服我訓辭。

遙授李思齊江西行省左丞誥

朕起布衣。除暴亂。救民於水火之中。其有能知天命所在。帥衆來歸者。朕每嘉焉。爾李某。當元運之衰。奮自汝南。擁兵而守秦隴。積年屯戍。志在保民。及我師入關。乃西往臨洮。已而率其士馬之衆。納款轅門。去危而就安。轉禍而爲福。視彼暗於事幾。殘民以逞者。相去遠甚。可謂通時達變之豪傑矣。茲授左轄於外。

省列之朝班。仍給其祿。爾尙夙夜恪愼。思保令名。以稱朕優禮之意。爾其懋哉。

侍御史王居仁除山西行省參知政事誥

國家之建行中書。所以控制方面而布宣政令者也。况河東山西之地。古爲雄藩。所轄州郡不翅六十有餘。版籍之廣。民庶之繁。其事亦云夥矣。邇者鑄印開省。未設丞弼。先命近臣爲參知政事。奏辟官屬以行。則是大小之務皆得專達。非止參預而已也。與斯選者。非得助舊之臣。曷足以重其任哉。具官王某才足以匡時。謀足以經遠。自渡江以來。委身事朕。凡十五年。踐數中外。多著勞烈。執法中臺。聲聞益著。於是簡在朕心。俾躋政府。嗚呼。陳紀立經。爾尙膺藩宣之寄。安邊靖國。爾其盡撫綏之方。往惟汝諧。毋替朕命。

同知臨洮府事班景道除陝西行省參知政事誥

陝西在古爲雍州之域。三秦之地。延袤一千餘里。土廣物殷。號稱難治。朕嘗建行中書。設參知政事。以綜覈衆務。以鎮安萬民。然必得同寅協恭之臣。共釐治之。則事集而功成不難矣。具官班某。負倜儻之才。抱經濟之略。朕嘗歷試其爲人。設施次第。綽有可觀。故自臨洮別駕。特授以參預之職。夫別駕四品之秩也。較之參預之資。實超十階。豈不以爾韞此奇才。故不次而用之乎。爾尙夙夜惟勤。思稱朕懷。官政之有弊者。爾當振而新之。民瘼之未瘳者。爾當撫而摩之。則予一人汝嘉。爾其欽承。朕言不再。

擬誥命起結文

吏部尙書

程能而議功。定勳而頒爵。此皆選部主之。所以古者眞於五曹之右。重其任也。蓋國家之治。在於得人。得人之盛。繫乎銓衡者。甄別其能否。然則天官之選。可不慎歟。具官云云。爾尙允釐百工。以熙庶績。名器之崇卑。爾當慎其注授之方。流品之清濁。爾當展其激揚之志。時惟稱職。汝往欽哉。

表

進新律表

臣聞天生烝民。不能無欲。欲動情勝。詭僞日滋。強暴縱其侵陵。柔懦無以自立。故聖人者出。因時制治。設刑憲以爲之防。欲使惡者知懼。而善者獲寧。傳所謂獄者萬民之命。所以禁暴止邪。養育羣生者也。譬諸禾黍。必刈稂莠而後苗始茂。方於白粲。必去沙礫而後食可餐。苟梗化敗俗之徒。不有以誅之。雖堯舜不能以爲治。夫自軒轅以來。代有刑官。而五刑之法。漸著其詳。弗可復知。逮魏文侯師於李悝。始采諸國刑典。造法經六篇。漢蕭何加以三篇。通號九章。曹魏劉劭又衍漢律爲十八篇。晉賈充又參漢魏律爲二十篇。唐長孫無忌等又取漢魏晉三家擇可行者。定爲十二篇。大概皆以九章爲宗。歷代之律。至於唐亦可謂集厥大成矣。洪惟皇帝陛下。受上天億兆君師之命。登大寶位。保乂臣民。孳孳弗怠。其訓迪羣臣。諄復數千言。唯恐其有犯。慈愛仁厚之意。每見於言外。是大舜惟刑之恤之義也。矜憫愚民無知。陷於罪戾。法司奏讞。輒惻然弗自甯。多所寬宥。是神禹見辜而泣之心也。唯貪墨之吏。承踵元弊。不異白粲中之沙礫。禾黍中之稂莠也。乃不得已假峻法以繩之。是以臨御以來。屢詔大臣更定新律。至五六而弗倦者。凡欲

生斯民也。今又特敕刑部尚書劉惟謙重會衆律以協厥中。而近代比例之繁。姦吏可資爲出入者。咸痛革之。每一篇成。輒繕書上奏。揭於西廡之壁。親御翰墨爲之裁定。由是仰見陛下仁民愛物之心。與虞夏帝王同一哀矜也。易曰。山上有火。旅。君子以明慎用刑而不留獄。言獄不可不謹也。書曰。刑期於無刑。言辟以止辟。而民自不敢犯也。陛下聖慮淵深。上稽天理。下揆人情。成此百代之準繩。實有易書之奧旨。行見好生之德。洽於民心。凡日月所照。霜露所墜。有血氣者。莫不上承神化。改過遷善。而悉臻雍熙之治矣。何其盛哉。臣惟謙以洪武六年冬十一月受詔。明年二月書成。篇目一準之於唐。曰名例。曰衛禁。曰職制。曰戶婚。曰廩庫。曰擅典。曰賊盜。曰鬪訟。曰詐僞。曰雜律。曰捕亡。曰斷獄。采用已頒舊律二百八十八條。續律百二十八條。舊令政律三十六條。因事制律三十一條。掇唐律以補遺一百二十三條。合六百有六。分爲三十卷。其間或損或益。或仍其舊。務合重輕之宜云。謹俯伏闕廷。投進奉表以聞。臣等誠惶誠懼。稽首頓首。謹言。洪武七年 月 日具官臣等上表。

進元史表

伏以紀一代以爲書。史法相沿於遷固。考前王之成憲。周家有監於夏殷。蓋因已往之廢興。堪作將來之法戒。惟元氏之有國。本朔漠以造家。用兵戈以爭強。并部落者十世。逐水草以爲食。擅雄長於一隅。逮至成吉思之時。大會斡難河之上。始尊位號。漸定教條。既近取於乃蠻。復遠攻於回紇。渡黃河以蹴西夏。踰居庸以瞰中原。太宗繼之。而金源爲墟。世祖承之。而宋籙遂訖。立經陳紀。一道同風。肆宏遠之規模。成混

一之基業。爰及成仁之主。見稱願治之君。唯祖訓之式遵。思孫謀之是遺。自茲以降。聿號隆平。豐亨豫大之言。鼓倡於天歷之世。離析渙奔之禍。馴致於至正之朝。嬖幸蠱惑於中。權姦蒙蔽於外。漢網祇因於疏闊。周綱遽至於陵遲。風憲皆爲不捕之猫。將士盡成反噬之犬。由是羣雄角逐。九域瓜分。風波徒沸於重溟。海岳竟歸於真主。中謝欽惟皇帝陛下。奉天承運。濟世安民。建萬世之丕圖。紹百王之正統。太陽出而燭火息。率土生輝。迅雷鳴而衆響徵。鴻音斯播。載念盛衰之故。仰推忠厚之仁。僉言實既亡而名亦隨亡。獨謂國可滅而史不當滅。特詔遺逸之士。欲求議論之公。文詞勿至於艱深。事迹務令於明白。苟善惡瞭然在目。庶勸懲有益於人。此皆天語之丁寧。愈見聖心之廣大。於是命翰林學士臣宋濂。待制臣王禕。儒士臣汪克寬。臣胡翰。臣宋禧。臣陶凱。臣陳基。臣趙壘。臣曾魯。臣趙汴。臣張文海。臣徐尊生。臣黃箴。臣傅恕。臣王錡。臣傅著。臣謝徵。臣高啓。分科修纂。故上自太祖。下迄甯宗。靡不網羅。嚴加搜采。恐玩時而愒日。每繼晷以焚膏。故於五六月之間。成此十三朝之史。況往牒舛訛之已甚。而他書參考之無憑。雖竭忠勤。難逃疎漏。若自元統已後。則其載籍無存。已遣使而旁求。俟續編而上進。愧其才識之有限。弗稱三長。兼以紀述之未周。殊無寸補。臣濂忝司鈎軸。幸覩成書。信傳信而疑傳疑。僅克編摩於歲月。筆則筆而削則削。敢言褒貶於春秋。仰塵乙夜之觀。期作千秋之鑑。所撰元史本紀三十八卷。志五十三卷。表六卷。傳六十二卷。目錄二卷。通計一百三十萬六千五百餘字。謹繕寫成百二十冊。隨表上進以聞。

致仕謝恩表

翰林學士承旨。嘉議大夫。知制誥。兼修國史。兼太子贊善大夫。臣宋濂。誠歡誠忭。稽首頓首上言。臣聞生世而逢真主。仕宦而歸故鄉。此人臣至榮而至願也。臣本一介書生。粗讀經史。在前朝時雖屢入科場。曾不能沾分寸之祿。甘終老於山林。今幸遭逢聖主。定鼎建業。特敕省臣遣使者致幣起臣於金華山中。俾典儒臺。繼陞右史。侍經東宮。供奉翰苑。去歲欽蒙特除承旨。爲文章之首臣。而次子璉。擢中書舍人。長孫慎。殿廷序班。一門三世俱被恩榮。近者又荷追封祖父。親御翰墨。寵以雄文。粲然奎壁之光。照耀霄漢。且憐臣年老。令致政還鄉。又有冠服文綺寶楮之賜。鴻澤滂沛。不一而足。其高如天。其厚如地。其照臨如日月。非筆墨可盡述。臣誠懼誠忭。稽首頓首。欽惟皇帝陛下。以布衣混一四海。如漢高祖。以仁義化被萬方。過唐太宗。宵衣旰食。孜孜圖治。欲使天下蒼生無一夫不被其澤。雖以臣之愚陋。無寸尺之功。亦蒙寵遇如此之至。銘心鏤骨。誓不敢忘。自度無以效犬馬之誠。唯朝夕焚香。上祝千萬歲壽。及以忠勤教子孫。俾世世無忘陛下深仁厚德而已。臣無任瞻天仰聖。激切屏營之至。謹奉表稱謝以聞。臣濂誠懼誠忭。稽首頓首謹言。洪武十年二月十二日。具官臣濂謹上表。

致仕謝恩箋

具官臣宋濂。誠惶誠忭。稽首頓首上言。近者欽蒙聖恩。追贈二代。許臣致仕還鄉。臣自正月初六日。陛辭。十日發舟。二十七日到家。二月初三日詣墓所。祭告昭宣制命。龍光烜赫。下燭泉壤。鄉里親朋一時畢會。相與嘆慕。以謂天朝待士如此之至。莫不感激思奮。此皆皇上之大德。殿下之深恩。願臣區區。何以圖報。

於萬一臣聞古聖人有言曰爲君難。其所謂難者何也。蓋以四海之廣。生民之衆。受寄於一人。敬則治。怠則否。勤則治。荒則否。親君子則治。近小人則否。其機甚微。其發至於不可遏。不可不謹也。所以二帝三王相傳心法曰德曰仁曰敬曰誠。無非用功於此也。治忽之間。由心之存不存何如耳。臣誠惶誠忭。頓首頓首。恭惟皇太子殿下。仁孝溫恭。出言制行。動合至道。中外無不仰望。而臣猶以二帝三王相傳心法爲言者。誠以爲君之難也。臣退居田里。而忠愛之心彌切。旦夕不忘。於是敢貢芻蕘之言。伏望殿下察臣所言而篤行之。則天下幸甚。臣無任瞻仰激切屏營之至。謹奉箋申謝以聞。臣濂誠惶誠忭。頓首頓首。謹言。

宋學士全集卷之二

記

觀心亭記

昊天純佑九月。民全以所覆畀。我聖朝皇帝執符御歷。撥亂世而反之正。化行仁流。臻於泰甯。然猶孜孜夙夜。敬厥德。奉若天道。赫如上帝。鑒臨。乃洪武十年冬十月丙午朔。復敕工曹造觀心之亭於宮城上。設甃爲墉。塗以赭泥。中置黼座。前闢彤戶。越七日壬子落成。上親幸焉。召臣濂語之曰。人心虛靈。乘氣機出入。操而存之爲難。朕罔敢自暇自逸。譬魚之在井。雖未免跳躑。終不能度越範圍。況有事於天地廟社。尤用祇惕。致齋之日。必端居亭中。返視却聽。上契沖漠。體道凝神。純一弗二。庶幾將事之際。對越在天。洋洋乎臨其上。卿爲朕記之。傳示來裔。咸知朕志。俾弗懈愈虔。臣拜手稽首而颺言曰。書有之。惟天無親。克敬爲親。民罔常懷。懷於有仁。鬼神無常享。享於克誠。曰誠曰敬曰仁。皆中心所具。非由外鑠我也。此心若存。則動靜合道。建中保極之源。清而弗擾。庶績咸熙。否則天飛淵淪。凜乎若朽索之馭六馬。唯欲之從而罔克。攸濟治忽之幾。其始甚微。不可不慎也。欽惟皇帝陛下。法天啓運。乾乾終日。不遑暇食。十有五年。大統斯集。政平人和。休祥屢應。斯皆觀心之明驗。古先哲王相傳心法。所謂精一執中之訓。亦不過此。聖子神孫。必來取法。當有不言而喻者矣。雖然。靡不有初。鮮克有終。臣願陛下存神內居。常如亭中時。則心與天

爲一祥刑敷政。壹出自天。衍億萬年無疆之休。亦永無疆之聞。不亦顯哉。臣不佞。既承詔旨。輒稽古書而爲之記。別有觀神亭。與斯亭東西對峙。其制同。其義亦無異云。

遊琅琊山記

洪武八年十有一月壬子。皇上以皇太子暨諸王久處宮掖。無以發舒精神。命西幸中都沿道校獵。以講武事。濂實奉詔扈從。十有二月戊午。次滁州驛。濂進啓曰。臣聞琅琊山在州西南十里。晉元帝潛龍之地。帝嘗封琅琊王。山因以名。頗聞秀麗偉拔。爲淮東奇觀。願一遊焉。而未能也。敢請。皇太子驩然可之。卽約四長史同行。秦王府則林伯恭。晉王府則朱伯賢。楚王府則朱伯清。靖江王府則趙伯友。遂自驛西南出。過平臯約三里所。望豐山盤亘雄偉。出琅琊諸峯上。唐梁載言十道志又云。豐亭山。山上有漢高祖祠。又有飲馬池。世俗妄傳漢高祖曾飲馬於此。國朝以山麓爲畜牧之場。別鑿池飲馬。仍揭以舊名。居人指云。山下有幽谷。地形低窪。四面皆山。其中有紫微泉。宋歐陽公修所發。泉上十餘步。卽豐樂亭。直豐樂之東。數百武至山椒。卽醒心亭。由亭曲轉而西入天甯寺。今皆廢。唯涼煙白草而已。濂聞其語。爲悵然者久之。山東南有柏子潭。潭在深谷底。延袤畝餘。色正深黑。卽歐陽公養龍處。上有五龍君祠。皇上初龍飛屯兵於滁。會旱暵。親挾雕弓。注矢於潭者三。約三日雨。如期果大雨。及御寶歷。爲作欄楯護潭。且新其廟。廟側有時若亭。濂坐亭上。問潭側雙燕洞。及其南白鵠洞。以肆窮覽。人無知者。乃止。復西行約三里。所有泉瀉出於兩山之間。分流而下。曰釀泉。潺湲清激。可鑑毛髮。傍岸有亭曰漸入佳境。今亦廢。唯四大字勒崖石。

間。清熙中。郡守張商卿等題名尙存。沿溪而上。過薛老橋。入醉翁亭。亭久廢。名人石刻頗夥。兵後焚煉爲
堂殆盡。亭後四賢堂亦廢。亭側有玻璃泉。又名六一泉。石闌覆之。闌下壓以巨石。中疏一竅通泉。徑可五
六寸。手掬飲之。溫。是日天陰。雪花翩翩。伯清亟倡曰。雪作矣。不還將何爲。濂遊興方濃。掉頭去弗顧。其
步若飛。歷石徑一里所。至回馬嶺。伯友追而至。伯清繼之。伯友曰。二客足力弱。不能從矣。二客伯賢伯恭
也。其謂回馬者。建炎寇盜充斥。郡守向子伋。因山爲寨。植東西二門。西曰太平。東乃回馬也。嶺之東有醴
泉。又其東南有栲栳山。山之南有桃花洞。又南有丫頭山。山之下有熙陽洞。皆未暇往。蛇行磬折。黃茅白
草。間莽不知所之。宋熙甯初。僧崇定獲佛舍利六百。壘石爲四十九塔於道隅。壘如貫珠。塔雖廢。幸有
遺址可憑。徑行無疑。其路若窮。又復軒豁。蓋峯回路轉。九鎖而至開化禪院。院在琅琊山最深處。惜乎山
皆童而無蔚然深秀之趣。唐大曆中。刺史李幼卿。與僧法深同建此院。卽張文定公方平寫二生經處。三
門外有觀音泉。入院皆瓦礫之區。唯新構屋三楹。間中施佛像。僧紹甯出。速坐方定。龍興院僧德學。同太
子贊善孟益。秦王伴讀趙鑄。吳王伴讀王驥。楚王伴讀陳子晟。聞濂入山。咸來會。晟云。太子正字桂彥良
憩六一泉上。亦足弱不能進。恐隨二客歸矣。甯具飯飯客。飯已。學引觀庶子泉。泉出山罅中。乃幼卿所發。
李陽冰所篆。銘已亡。張億書三字碑。亦斷裂臥泉下。石崖上多諸儒題名。陷石爲一方。鐫勒其中。自皇
祐。洎熙乾道以來。皆有之。字或篆。或隸。或楷。或可辨。或不可辨。山之東西。在在皆然。不特此泉也。泉之南
有白龍泉。禱雨多驗。童行堂下有明月溪。稍南有吳道士畫觀音。及須菩提像。刻石壁上。傍鐫淮東部使

者八人。舜臣琅琊山記。頗不合文體。爲之破顏一笑。又稍南有華嚴池。由明月而上入歸雲洞。訪千佛塔遺址。過石屏路。俯窺大厓井。井亦幼卿所鑿。沿山腰陟磨拖嶺。遠望大江如練。鐘阜若小青螺。在游氣冥茫中。聞嶺下有琅琊洞。洞廣兩室。中有一穴深不可測。名人頗識無異庶子泉。懼日夕復不暇往。然自幼卿博求勝跡。鑿石引泉以爲溪。左右建上下坊作禪室琴臺。後人頗繼其風。山中之亭。幾二十所。而日觀望月爲尤勝。今荆榛彌望。雖遺跡亦無從求之。可歎哉。夫亭臺廢興。乃物理之常。奚足深慨。所可慨者。世間奇山川如琅琊者何限。第以處於偏州下邑。無名勝士若幼卿者黼黻之。故潛伏而無聞焉爾。且幼卿固能使琅琊聞於一方。自非歐陽公之文。安足以達於天下。或謂文辭無關於世。果定論邪。然公以道德師表一世。故人樂誦其文。不然。文雖工未必能久傳也。傳不傳亦不足深論。獨念當元季釋騷。竄伏荒土。朝不能謀夕。今得以廁跡朝班。出陪帝子巡幸。而琅琊之勝。遂獲窮探。豈非聖德廣被。廓清海宇之所致邪。非惟濂等獲沾化育生成之恩。而山中一泉一石。亦免震驚之患。是宜播之聲歌。以侈上賜。遊觀云乎哉。因取醉翁亭記中語。風霜高潔。水落石出。字爲韻。各賦一詩。授主僧紹廣刻諸山石云。

元史目錄記

洪武元年秋八月。上旣平定朔方。九州攸同。而金匱之書悉輸於祕府。冬十有二月。乃詔儒臣發其所藏。纂修元史。以成一代之典。而臣濂臣祿實爲之總裁。明年春二月丙寅開局。至秋八月癸酉書成。紀凡三十有七卷。志五十有三卷。表六卷。傳六十有三卷。丞相宣國公臣善長率同列表上。已經御覽。至若順帝

之時。史官職廢。皆無實錄可徵。因未得爲完書。上復詔儀曹遣使行天下。其涉於史事者。令郡國上之。又明年春二月乙丑開局。至秋七月丁亥書成。又復上進。以卷計者紀十。表二。傳三十。又六。凡前書有所未備。頗補完之。其時與編摩者。則臣趙彥。臣朱右。臣貝瓊。臣朱世濂。臣王濂。臣王彝。臣張孟兼。臣高遜志。臣李懋。臣張宣。臣李汝。臣張簡。臣杜寅。臣俞寅。臣殷弼。而總其事者。仍臣濂。與臣棹焉。合前後二書。復釐分而附麗之。共成二百一十卷。舊所纂錄之士。其名見於表中者。或仕或隱。皆散之四方。獨彥能始終其事。云。昔者唐太宗以開基之主。干戈甫定。卽留神於晉書。敕房元齡等撰次成編。人至今傳之。肆惟皇上龍飛江左。取天下於羣雄之手。大統旣正。亦詔脩前代之史。以爲世鑒。古今帝王能成大業者。其英見卓識。若合符節。蓋如是。嗚呼盛哉。第臣濂等以荒唐繆悠之學。義例不明。文詞過陋。無以稱塞詔旨之萬一。夙夜揣分。無任戰兢。今鏤板訖功。謹繫歲月次第於目錄之左。庶幾博雅君子相與刊定焉。洪武三年十月十三日。史臣金華宋濂謹記。

歙縣孔子廟學記

歙。漢縣也。初屬丹陽。自吳晉而下。雖屢更爲郡。若州而縣。仍舊名不廢。其地爲東越輿區。號多佳山川。黟川如龍前行。偃蹇不受羈。紫陽問政二山。又矗起東南。勢若翔鳳。鳳凰飛布紫金諸峯。又騰翥於後先。而黃山又直西北。奇巒之不可名者。凡三十六。丹崖翠岑。分割陽陰。而吐蘇降精於無窮。故士之生其間者。或以氣節著。或以道藝名。時有其人。近代尤稱多士。立言著書。動足名家。是固因山川之靈攸鍾其沈涵。

陶育之者。非立學之所致歟。初學在縣市之東。淳祐庚戌。郡守謝堂始建。至大庚戌。縣尹宋節。至正甲申。縣丞葉琛。皆葺而新之。壬辰兵起。而歙爲鬪爭之場。官廬民舍。焚燬無遺。而學亦廢矣。澹煙荒照。榛荆蔽途。而狐兔或暮出衝人。識者爲之傍徨太息。如是者十年。辛丑之夏。張侯齊來爲縣。慨然歎曰。歙爲徽國文公父母之邦。道德之化。衣被天下。雖時常尙武。而其鄉學可久廢乎。遂請於大府而經營之。會故基已更搆紫陽書院。遂於書院之東立表考官。翦刈穢荒。別畚新土。充其虧窪。高爽塏疏。有櫺其舊。中峙正寢。象厥正配。黼坐朱几。嚴事有容。旁岡從祀於兩廡間。外廡正門。列以畫戟。法庭端潔。城半密叢。欄楯翼遮。衢道直脩。外爲都墉。樹以三門。上應靈星。榮光昭煥。廟左別築論堂直齋。以處諸師。暨弟子員。不啻不侈。無魯藝憲。經始於秋九月。考成於明年壬寅之秋八月。侯帥儒師行釋奠禮。牲幣有飭。庭燎伊煌。罇俎維旅。法齊苾芬。神來顧歆。如在左右。觀者歎慕。至於咏蹈。僉謂侯之嘉惠吾民者深。不可無以貽永久。於是教諭江君材奉幣請文。刻諸麗牲之碑。惟先王之制。自諸子以至公卿大夫士之子。使之脩德學道。春合諸學。秋合諸射。以攷其藝而進退之。是文事武備。均出於學也。所以興師必受成而行。及其還也。則釋奠於學。而以訊馘告。曷嘗析爲二哉。自世道旣衰。不復獲沾先王之澤之盛。人徒見提旛鼓而簡車徒者。乃指爲武。殊不知制勝兩楹。折衝千里。而有所謂詩書之帥也。侯於下車之初。能汲汲建學於用武之日。可謂知斯道矣。歙之人士尙當專心一力。惇於明體適用之學。平居之時。則談俎豆而攻遺經。一遇四郊有警。則操戈上。以收獻馘之功。使議者咸曰。是生文公之邦。而無忝山川之靈者。庶幾不負建學之意。不

然。豈予之所敢知哉。侯字仲賢。齊其名也。某郡人以行中書掾擢爲令。招徠懷集。民驩趨之。遂成市落。縣廨驛舍。皆新作之。而尤急於農功。築呂場及良干范院二埭。歲以有秋。其善政蓋不一而足。當時相其成者。則丞胡洪辰。主簿王某。及江君云。

集賢大學士吳公記代

先公諱直方。字行可。姓吳氏。其先毗陵人。一遷於鄱。再遷於睦。三遷浦陽之新田。唐乾甯初。有諱公養者。又遷縣西尊仁里。至先公十五世。曾祖諱聞。贈中奉大夫。福建道宣慰使。護軍。追封渤海郡公。妣盛氏。追封渤海郡夫人。祖諱蕃。累贈資善大夫。太常禮儀院使。上護軍。追封渤海郡公。妣沈氏。追封渤海郡夫人。父諱伯紹。累贈翰林學士承旨。榮祿大夫。柱國。追封渤海國公。妣金氏。追封渤海國夫人。先公自幼有大志。篤意儒學。及壯。遊京師。主留守馬扎兒台家。教其子脫脫及也先帖木兒。元統間。脫脫爲御史中丞。以先公嘗用說書。事明宗於潛邸。奏除江浙等處儒學提舉。中書易爲副提舉。階將仕佐郎。先公年已六十一矣。未上。御史臺改授將仕郎。海北廣東道肅政廉訪司管勾。承發架閣庫。兼照磨。遷中政院管勾。承發架閣庫。復陞長史。階咸如故。重紀至元末。廟堂用事者頗擅威福。上與大臣謀罷其政柄。先公實協贊之。上念其功。召至便殿。錫以黃金繫帶。超拜集賢直學士。就轉侍講學士。未幾。陞學士。歷亞中。中奉。資善。三階。大夫。會脫脫入相。中書國有大政令。多咨先公而後行。先公每引古義告之。言無不聽。民被其澤爲多。先公以年及致仕。上章乞骸骨。遂以集賢大學士榮祿大夫食俸賜終身。俄又賜田一千九百餘畝。尋謝不受。

先公前娶盛氏。先十七年卒。後娶金李二氏。金氏封渤海國夫人。子男二。長萊。字立夫。延祐庚申以春秋經預鄉薦。後用御史薦舉爲饒州路長蘅書院山長。博學能文章。爲世聞人。亦先十七年卒。次卽志道。崇文監丞奉訓大夫。孫男三。長士諤。婺州路金華縣儒學教諭。次士謐。次存仁。曾孫男三。長中。次平。次弁。曾孫女一。申。先公生於宋德祐乙亥十一月二十四日庚寅。薨於今至正丙申七月十二日庚寅。享年八十有二。卜以是年八月十二日庚申葬德政鄉後吳山徐塢之原。距承旨公墓左五十步而近。嗚呼。褒敍令德。是在世之立言君子。非不肖孤所敢僭。始序世系及歷官次第納諸玄堂。別錄其副以藏於家。庶幾後人知所攷焉。嗚呼痛哉。孤子志道泣血謹記。

浙東行省右丞李公武功記

惟我皇帝既定浙東西地。以其疆場與寇人犬牙相入。乃置浙東行省。以轄五府一州之衆。建牙於嚴。於時右丞李公實以上之懿親。總受藩宣之寄。而兼命參知政事。胡公德濟分治諸暨。所以聯絡氣勢。綏輯東土。而折衝外侮者也。乃乙巳之春二月己丑。寇挾我叛人謝再興分兩道入寇。其舟師自釣臺烏石窺我建德。公遣兵禦之。其馬步卒踰濤江而東。圍諸暨之新城。聲言二十萬。壁壘旁午。旌旗充塞。寇堅忍持重。務以爲必拔之計。構飾寢宇。創建倉庫。預定州長貳官屬。復分精卒數萬屯城北十里。以遏我援師。胡公堅壁力守。戒將士勿輕與戰。有來攻城者。發矢石退之。遂遣使乞師於公。公卽欲馳援。初釣臺之役。稍不利。亡一千夫長。至是羣情疑沮。或獻謀於公曰。嚴實吾藩垣所寄。寇若闕公往。卽起乘之。奈何。諸暨雖

受圍得一銳將帥解焉可也。公曰：浙水東門戶在諸暨，諸暨苟不守，郡縣必致繹騷，故寇盛兵東向，而使游兵泝釣臺以綴我師。我不往，脫有弗靖，嚴其能獨利乎？乃屬大帥三人爲居守，明日癸丑遂行。有自寇中來者，又以衆寡不敵爲辭。公弗顧，甲寅至浦江，丁巳抵烏傷之龍潭，去寇營不二十里。因據其險，忽有白氣自東北經天，三軍見之，勇氣百倍。日且晡，軍中驚言寇將襲我，公亦不爲動。夜四鼓，城中知有援至，潛縋士卒來約，明旦將空壁逆戰。戊午，蓐食已，公分諸將爲左右翼，公自將其中軍。旣成列，會參軍胡君深復承公檄，率所部將士亦自括而至，軍氣益振。公乃申號令曰：師之勝負，在曲直不在寡多，我國何負於叛人？寇乃挾之日夜以生變。癸卯之秋九月壬午，直犯我東陽，吾不敢愛其生，晝夜兼行，殄之於烏傷。爾三軍之所親覩，皇天助順，不可誣也。今寇又不改行，盡驅其衆以擾我邊疆，占書云：軍中見白氣者，剋敵之像。此殆天欲滅此寇也。爾等尙效死，斬刺以報國家之寵靈，毋怯，毋貪獲，毋避險阻，毋左右顧視，有不如約者，卽戮以徇。語始畢，寇兵整圓陣而至，兵旣接，公乘匹馬挺身先入，陷其中軍。中軍寇之精銳所萃，見公至，競來迫之，槍屢及公膝。公馬上運戟捷如雨風，當其鋒者應手皆仆。寇氣皆鬱，左右翼及諸軍一齊奮擊，聲振天地。軍遂大亂。時溪洞兵居後列，猶觀望欲集，兩山之民呼曰：寇敗矣，寇敗矣，遂皆棄甲而奔。我軍乘勝逐北，斬首如刈麻。前後躡踐死者以萬餘計。溪水爲之不流。胡公亦率精甲出圍城中，從公合擊之，殺獲甚衆。其主帥僅以身免，燔其營寨若干，俘其將帥六百，軍士三千，馬八百，輜重鎧仗，積如丘山。三月己未，凱歌而旋。所至父老爭進牛酒爲公壽，公勞而却之。辛酉還嚴，旣飲至，卽命幕府上其

功薄於朝。上嘉公敵愾之功。錫以御衣名馬。其餘將士。第功行賞有差。濂聞之。軍譏之。論良將有曰。以身先人。故其兵爲天下雄。說者引薛仁貴爲將。持戟腰刀。奮呼入敵。衆輒爲之奔潰。此所以爲天下之雄也。濂以公之事觀之。殆似有過焉者。蓋仁貴挺身陷陣。其驍悍若與公同。然必兩軍相當。方可制勝。未聞其以寡却衆如公之爲也。今寇兵大集。塞野蔽川。人孰不爲公危。公以不滿萬之衆。談笑而殲之。斯不亦昔人之所尤難哉。由公精忠貫於內。勁氣注於外。但知有國而不知有其身。瞋目張膽。視寇若無。故其功業焜耀。至於如此也。公之賢爲不可及矣。濂昔待罪右史。嘗書公之勞烈。藏之金匱。今又因邦人士之請。爲文若詩。以昭公之光。庶使世之讀者。上毋忘於帝德。下無負於公之功云。公名文忠。字世英。敬賢下士。如弗及。平居恂恂禮遜。及臨大敵。雖資育之勇。不是過。君子服焉。系之以詩曰。於赫皇王。太陽東升。燦彼羣陰。六合載清。建藩分鎮。以奠以甯。倬彼李公。實蒞東浙。虎符煌煌。侑以龍節。導宣皇靈。德柔威刷。吳寇逞虐。登我叛臣。屢起兵燹。來毒烝民。亦旣搗之。化爲埃塵。龍集鶡首。在如之月。怙惡弗悛。竟犬之突。合圍諸暨。不通一髮。公聞之怒。氣沖斗間。咄哉狂寇。天紀之干。翹其若穀。闢此勁翰。迺飭將佐。整厥堅冑。穀厥凋戈。礪厥金鏃。我欲卽發。爾罔或沒。禡纛於門。載之以行。叶卒旅言言。旄幟翻翻。蛟螭騰淵。熊羆出山。直薄龍潭。伺敵而戰。有氣經天。其白如練。吉徵開先。何兵不翦。左右列屯。兩翼飛鶩。公將虎旅。宅其中堅。氣通脈聯。勢如率然。復戒多士。寇衆我寡。大刀長揮。毋獲士馬。要使青原。盡變爲赭。寇馳而至。公躍而前。單戟奮先。星流飈旋。閃閃莫定。觸之必顛。寇實驚疑。斯何爲者。莫匪神兵。自天而下。震懾相駭。弓不能弔。三軍

縱擊其亂如雲。混沌沌。紛紛紆紆。或斷其脅。或斷其齧。蠡彼有苗。猶爾偵視。山岷齊呼。倒戈而避。我師疾逐。其勢尤熾。如雷斯掀。如風斯奔。如火斯燄。融乾爛坤。一鼓而殲。凜焉雄吞。譬猶駕鵝。衆若雲翳。孤軍橫擊。無有不斃。將唯在勅。豈多爲貴。人亦有言。天監匪私。我直彼曲。孰不周知。以順討逆。云胡不夷。昔兵始交。毒霧蒙絡。今敵旣平。上下清廓。神道助順。理甚昭灼。奏凱而旋。旣歌且謠。歌聲委蛇。間以短簫。祥飈獻娛。嘉卉動搖。耆耄驩迎。列拜馬首。非公之臨。幾陷虎口。敢以牛酒。以爲公壽。三軍戾止。燕饗有容。公拜稽首。疏於章封。非臣之力。諸將之功。皇情悅豫。徵公入覲。珠衣龍馬。錫之不吝。第賞其餘。匪琛伊賁。自古在昔。六龍御天。必有良弼。參佐化權。遂開丕基。萬世其延。惟皇神聖。控御區宇。百僚師師。選有文武。親賢如公。綏我東土。綏我東土。我民用熙。無敵不靡。無徠不懷。成此武功。實耀簡書。簡書所紀。以勸在位。贊咏鋪張。遵古之義。史臣作歌。蹈揚奮厲。

故懷遠將軍高昌衛同知指揮使司事和賞公墳記

公諱和。賞。畏兀氏。世居高昌。曾祖紐憐。事元世祖有功。封高昌王。祖帖木兒不花。中書左丞相。父不答失里。中書平章政事。皆襲王爵。母也先忽都。封王夫人。公性警敏。能知時達變。幼亦紹王封鎮永昌。洪武三年。太兵下蘭州。公費印綬。自永昌率府屬詣轅門內附。詔授懷遠將軍。高昌衛同知指揮使司事。世襲其職。公乃開設官署。招集降卒數百人。會宋國公馮公勝奉勅征甘肅。命公移鎮西涼。轉輸饋餉無乏。朝廷嘉之。不幸以七年九月二十八日。卒於南京之寓舍。年二十有八。以十月八日。葬江甯縣聚寶門外五里。

呂氏花園。上遣使者祭奠。恩禮優渥。人皆以爲榮。公妻曰都堅。子一人。太平。女二人在室。惟公生於王家。暨入國朝。榮膺顯爵。方以事功自見。而賦年不永。惜哉。因爲疏其世系及卒葬大槩。納於墓以志其哀。

恆山精舍記

恆山精舍者。盱江王君伯昭藏修之所也。精舍建於盱江。恆山則在中山之陽曲。地之相去若是其甚遠也。而名之以恆山者何。示不忘其先也。蓋伯昭之先家於陽曲。其八世祖尙書左丞公。由進士起家。敎歷臺省。政和中。蔡京方居宰府。有徐禪者。增廣鼓鑄之說。以媚京。公劾止之。旣而京引方士以惑上。公復上疏言。并奏京欺君僭上。蠹國害民數事。直詞正氣。震動一時。公諱安中。字履道。世所稱初寮先生者也。公之子辟章。出守泉州。亦以政事聞。泉州之子秬。往來盱江。樂其水土之衍沃。遂徙家焉。至伯昭已更六世矣。伯昭締室麻姑山之下。東西之廣僅充三筵。楹礎鞏密。戶牖靚明。伯昭飲水著書其中。以樂先王之道。間嘗出戶而望。見夫林巒之蒼潤。煙霞之卷舒。晴容雨態之變移。輒北向泫然流涕曰。嗚呼。是山信美矣。吾其敢忘於恆山乎。恆山先世之所宅也。其杖屨所經。巖阿川曲。遺馨故在也。吾其可忘於恆山乎。恆山不可忘。則夫寤寐於先德者。或者庶幾其有合乎。於是名其精舍曰恆山。所以志也。濂竊聞之。昔者晉陽穆公。自江左遷於疏屬之南汾水之曲。惕然有感於中。其家廟座必東南向。曰。未忘先子之國也。穆公者。王虬也。著政大論八首。以言帝王之道。曾孫通因按之以續經。其人亦賢矣。今伯昭與虬皆王氏。而汾水陽曲。又皆冀州之境。安知其初不出於一族乎。穆公之所感。伯昭之所志。其道固宜相同也。其所異者。穆

公則自南而北遷。伯昭之先。則自北而南來爾。雖然。此不必較也。古之人不忘其先者。不齊其迹而追其德。使伯昭能振先德。而弗使之墜。則雖遷旴江而無殊於恆山。苟舍此而不圖。則雖世處乎恆山。日遊乎陽曲。亦奚翅久居於遐荒而忘其祖也乎。伯昭學贍而文雄。試藝鄉闈。嘗占前列。及其再貢。又冠多士。文光燦然。起於東南。如長虹貫天。無遠弗覩。大江之西。未能或之先也。而其爲人俊偉磊落。又有燕趙奇男子之風。異時立朝。勁氣直辭。必將無愧前人。伯昭雖不總總於恆山。濂亦知其能承家學矣。然而記有之。樂樂其所自生。禮不忘其本。伯昭蓋深達夫禮樂之原者。其能不致謹於斯乎。伯昭能致謹於斯。是則所以爲伯昭者也。

華川書舍記

華川書舍者。烏傷王君子充學文之所也。烏傷有大澤曰華川。唐武德間。嘗置華川縣。不久而縣廢。今之所謂繡湖者。卽其地也。子充之居直湖之陰。猶繫之以舊名。志乎古也。子充之志乎古。豈止此而已哉。上自羣聖人之文。下逮諸子百家之文。咸萃舍中。日冥搜而精玩之。大肆其力於文。愈出而愈無窮。以濂同受經於侍講黃先生之門也。請爲記書於舍壁。濂雖稍長於子充。視子充之辭鋒橫厲。百未能及一。縱強顏欲記之。將何以云耶。雖然。子充弱冠時。濂見其文。輒曰。子充他日當以文知名。今始十年。而子充名動薦紳間。識者遂以濂爲知言。濂雖不文。甯不爲子充一言乎。嗚呼。文豈易言哉。日月照耀。風霆流行。雲霞卷舒。變化不常者。天之文也。山嶽列峙。江河流布。草木發越。神妙莫測者。地之文也。羣聖人與天地參。以

天地之文發爲人文。施之卦爻。而陰陽之理顯。形之典謨。而政事之道行。咏之雅頌。而性情之用著。筆之春秋。而賞罰之義彰。序之以禮。和之以樂。而扶導防範之法具。雖其爲教有不同。凡所以正民極。經國制。樹彝倫。建大義。財成天地之化者。何莫非一文之所爲也。自先王之道衰。諸子之文。人人自殊。管夷吾氏。則以霸略爲文。鄧析氏。則以兩可辨說爲文。列禦寇氏。則以黃老清淨無爲爲文。墨翟氏。則以貴儉兼愛。尙賢明鬼。非命尙同爲文。公孫龍氏。欲屈衆說。則又以堅白名實爲文。莊周氏。則又以通天地之統。序萬物之性。達死生之變爲文。慎到氏。則又以刑名之學爲文。申不害氏。韓非氏。宗之。又流爲深刻之文。鬼谷氏。則又以捭闔爲文。蘇秦氏。張儀氏。學之。又肆爲縱橫之文。孫武氏。吳起氏。則又以軍形兵勢圖國料敵爲文。獨荀況氏。粗知先王之學。有若非諸子之可及。惜乎學未聞道。又不足深知羣聖人之文。凡若是者。殆不能悉數也。文日以多。道日以裂。世變日以下。其故何哉。蓋各以私說臆見。譁世惑衆。而不知會通之歸。所以不能參天地而爲文。自是以來。若漢之賈誼。董仲舒。司馬遷。揚雄。劉向。班固。隋之王通。唐之韓愈。柳宗元。宋之歐陽修。曾鞏。蘇軾之流。雖以不世出之才。善馳騁於諸子之間。然亦恨其不能皆純。揆之羣聖人之文。不無所愧也。上下一千餘年。惟孟子能闢邪說。正人心。而文始明。孟子之後。又惟春陵之周子。河南之程子。新安之朱子。完經翼傳。而文益明爾。嗚呼。文豈易言哉。自有生民以來。涉世非不遠也。歷年非不久也。能言之士。非不夥且衆也。以今觀之。照耀如日月。流行如風霆。卷舒如雲霞。唯羣聖人之文。則然。列峙如山嶽。流布如江河。發越如草木。亦惟羣聖人之文。則然。而諸子百家之文。固無與焉。故濂謂立

言不能正民極。經國制樹彝倫。建大義者。皆不足謂之文也。士無志於古則已。有志於古。舍羣聖人之文。何以法焉。斯言也。侍講先生嘗言之。子充亦嘗聞之。濂復取以爲子充告者。誠以子充將以文知名於世。不可不以羣聖人之文爲勉也。濂家芙蓉山之陽。距子充之居不二舍而近。他日謁子充於湖之陰。仰觀俯察天地之文。退坐書舍中。又參之以羣聖人之文。則濂與子充各當有所進也。子充以濂言爲然乎。雖然。濂言夸矣。子充幸爲我刪之。

月堀記

余退直詞林。戴華陽之巾。被鹿皮之裘。焚香默坐。存神規中。太和薰蒸。百體欣順。龍降虎升。水溫火寒。周流密綿。莫究端倪。冲陽子自空明洞天翩翩而來。碧瞳方頤。氣貌充甚。謁入揚袂言曰。月堀之義。子知之乎。揚雄云。西歷月堀。指月所生之地也。吾意則不然。太陰之精。朔後魄生。至望而盈。盈極而衰。隨日漸虧。晦而復蘇。上下二弦。虧盈得平。氣和弗偏。吾煉九還七返靈丹。抽添進退之候。每於月而取則焉。因名其室以月堀。所以志之。予曰。陽陰不可偏勝也。獨陽不生。獨陰不成。乾坤構精。六子乃凝。水坎火離。中藏偶奇。用奇變偶。乾道始茂。重陰盡消。純陽則昭。久而行之。與道逍遙。是謂三一之真也。復命之區也。若取則乎月。無乃專溺於陰乎。冲陽子曰。二氣之精。互爲其根。房日之兔。畢月之烏。取象表徵。指意甚微。陽既含陰。陰亦含陽。苟舉其偏。道則全張。子何見之拘邪。予曰。言則美矣。其理尙有所遺也。人身之中。有元牝焉。繫乎天根。呼吸所關。絲絡聯縣。枝葉扶疎。靜以養之一氣孔神。超於象先。不見其朕。玉色連娟。天光內朗。

蓋以無爲而得。無爲而成。孰火能爲其候。孰鼎能爲其鑪。孰藥能爲其材。我皆不得而知也。假形託物。著於丹書。顛倒錯亂。自漢以來。已如斯矣。吾將與子握手空明洞天之上。當素月流輝。銀鋪水翻。瑤露初滴。寂然無聲。委羽仙人。必騎黃鶴而一下之。與子稍一叩焉。則子之說爲當矣。沖陽子喟然而歎曰。道有精粗。象分內外。非粗不足以別精。非外不足以形內。初機之徒。未忘乎物。苟不以此示之。必大笑而走。何可與上士玄功之成者並論哉。子之說固當。而吾之所取喻。又豈可少哉。於是相視一笑。沖陽子揖而退。子送至庭外。沖陽子復請曰。一陰之生。其卦爲姤。是月堀也。一陽之生。其卦爲復。是天根也。邵子嘗往來其間。而所謂三十六宮。都是春者。其與吾月堀之義。頗有合乎。予曰。此大易精微所繫。雖更僕不能盡也。子惡能知之。子惡能知之。君當問諸庖犧。沖陽子曰。唯。沖陽子張姓。輔其名。以廷翼爲字。台之黃巖人。蓋有道之士也。洪武四年正月某日。元真遜叟金華宋濂記。

松風閣記

夫風者。天地之噫氣。然則生生者誰哉。生之者靜之體。而應之者動之用也。當其萬竅怒號。前者唱于而隨者唱喁。咸物之自取也。庭宇之松。蒼髯奮傑於晨露夕月之中。遇鮮飈過之。泠泠然如鸞鳳之鳴。如琴瑟之音。昔者陶隱居恆樂之。後世幽人狷士。又從而效之。或取以名其室焉。方外恬師靜菴。來徵所謂松風閣記。予請極其變者而言之可乎。始風之未生也。斂神功於寂默之中。昏昏冥冥。萬象雖具。不見其迹。天機一動。隨品物以流形。大海遇之。重波復浪。一瀉萬里。千山逢之。鱗甲掀動。笙鏞間作。經蒼蘊之林。則

郁烈酣潤。清芬之襲人。入鮑魚之肆。則腥穢逆鼻。觸之而嘔。如此者不可以一二數。苟獨指松而爲言。非所以極風之變者也。然其變者。豈皆有繫於風之動哉。先覺有云。風性本靜。以緣起故動。儻其性本動。則甯有靜時。是則物各有以自取也。且以吾心言之。大用繁興之時。怒氣熾然。如霆奔火烈。喜色熙然。如霧廓霞舒。興衰則千人實涕。鼓勇則萬夫莫敵。皆此一心之變也。然心果有變乎。心無變。其所變者緣爾。故當本體澄湛之際。無物不有。而無一物之留。以近取譬。所謂生之者靜之體。而應之者動之用。豈非然歟。予家浦陽大山中。青松羅桓舍之北。南明月之夜。白露初零。默然出坐庭際。松聲到耳。乍大乍小。或亟或徐。中心頗樂之。方知隱居酷愛之者。良有以也。自松聲而推之。世間之聲萬變不齊。雖不可勝窮。其道亦不外是矣。譬一滴之醖。而知滄海之性。窺寸隙之光。而見日輪之體。又何以紛紜爲哉。恬師學佛之流。故子極其變而告之。須知變之中。而有不變者存。不變者何。前所謂心者是也。心無體段。無方所。無古今。無起滅。三世諸佛。不見其有餘。河沙凡夫。不見其不足。恬師能索之於此焉。則松風朝夕。所演無非大乘微妙之法。隱居惡足以語此哉。閣在越之耶溪上。季蘅若公之所建者。因得徑山範公所書松風二大字。遂揭以爲名。予謂徑山古之名德。其字不可褻玩。宜別求善書者易之。旣告之故。復爲記其事如右。其詳則見天竺法師道公所爲文。其妙無以加矣。予何言哉。

生生堂記

生生堂者。東陽陳澤民之所居也。縣南八十里。有鄉名瑞山。陳氏世家其中。至諱宗譽。字彥聲者。有德於

鄉又能與陸務觀父子游。而其諸孫黼、東萊、呂成公弟子擢淳熙辛丑進士第。累官駕部郎中。林正惠公實以女妻之。澤民蓋其十世從孫也。澤民思繼承家學。出從名師巨儒游。精於科目之業。有司貢上選。曹試經義合格。署通判於漳州。將上以堂記屬子。子頗聞縣之仁壽鄉。在東北四十里而近。有簪纓家亦與澤民同姓。而譜牒不通。非其族也。嘗構宅一區。方建前楹。有鳩鳴其上。占之者云。此宅當屬之張氏。後六十年復歸於陳。未幾。西鄰張氏果來居之。張旣不振。人士皆謂復還於始構之家。不知乃澤民竟以重貲獲之也。僂指計之。誠甲子一周矣。噫。亦異哉。澤民遂筮日自瑞山而遷。當春氣煦明。卉木含榮。有嚶其鳴。澤民刲羊刺豕。具尊俎。合賓姻而燕樂之。酒微酣。坐客擊案爲節而歌之曰。有歸者堂。高明之居。蔚蔚紆紆。曲櫟而交疏。惟德之符。冥數懸應。不爽乎錙銖。繼有賡之者曰。新居其遷。弗祿其延。族姓其聯。演迤而萃。縣於是州邑之間。咸稱事有前定。澤民之遷居。有不偶然者。澤民因取書中生生自庸之義。用以名其堂。嗚呼。生生之義。雖見於書。而莫備於易。易云。生生之謂易。夫陰之生陽。陽之生陰。生生相續。變易而窮。澤民之居於此。他日子孫衆多。甚欲有類於易之言。有類於易之言。則生生不息矣。雖然。非積善之家。未足以致之。然所謂善者何。盡孝以事親。竭忠以事君。德義以視身。信愛以睦鄰。仁惠以及民。五者備矣。方不愧名堂之義。爵祿之來。當未艾也。駕部翁孫。豈得專美於前哉。占者之云。蓋出於祲祥小數。而非君子之大道。此勿論焉可也。予老矣。文辭卑陋。不足應人之求。人翻疑爲矯。集其門者日益繽紛也。卷軸之積。動如束筍。近亦力排而深絕之矣。以澤民鄉人也。義不得辭。聊相與一言之。

怡養堂記

禮之不行。常白近而易能者始。惟其近也。故人忽之。惟其易能也。故人不加之意焉。事親人人之所能也。其事朝夕之所習也。聖人恐人忽而不加之意。自夫起居食息。寒暑疾病之微。問告拜跪。定省應對之節。皆著之禮經。可謂詳且備矣。然而能盡之者。雖君子猶難之。豈事親之禮誠難行哉。難乎其當也。甘膳之養。人所能致也。而敬難。敬人所能也。而愛難。敬欲其如事大賓。則何難之有。而非敬親之道也。愛欲其如愛妻子。則何難之有。而非愛親之道也。故敬而不愛。非所以事親也。愛而不敬。非所以事親也。愛而肅恭之禮成焉。敬而婉悅之意備焉。斯可以爲善養矣。凌江劉復初。父及繼母俱存。思盡事親之道。名其堂曰怡養。而請余記。夫記以紀事功。著其可見者。堂之作。吾不得而知。其可見者。人皆能言之。非事之所急也。然則舍事親之道。何以爲復初言乎。復初好學慎行。不待余言。以余事親先於復初。則知事親之難。莫余若也。故推其道以告之。俾書之壁。使後人有所興起焉。

復古堂記

監察御史虞秦魯瞻。嘗奉諸父元佐之命。請記其所名復古堂者。予以不文固辭。而魯瞻請之益勤。乃叩之曰。子之所謂復古者。以爲上古乎。上古之時。巢居而穴處。汙樽而抔飲。茹毛而飲血。子今有室。應器用之美。稻粱羊牛之饒。決不能復之。以爲中古乎。中古之制。冠弁裳衣。以定其分。鼎彝鼎爵。以稱其用。門與屋漏。以嚴其居。筵榻格几。以殊其度。雖曰異於上古。有可法者。子今狃於久安。必隨世而變遷。想亦未易

以復之也。然則子之復古者將何居。魯瞻笑曰。非是之謂也。虞氏之居餘姚。自漢日南太守以來。代有顯人。至唐永興文懿公爲尤著。文懿公實秦之遠祖。流裔至今二十七世矣。嶼山之南有虞家城。周圍一百五十丈。相傳以爲故宅之基。尙巋然獨存。諸父每相與登眺。白煙涼草。觸目悽然。輒彈指嘆曰。虞氏之先嘗光著矣。奈何無迓續徽猷者乎。復古之名蓋以此也。予曰。繼志述事。孝子慈孫所當爲。況思追紹於七百餘年之前。此其見之確。行之厲。是足尙已。第不知復於古者果止於斯否乎。魯瞻曰。何謂也。予曰。文懿公之爲人。外謹懦而中抗烈。固以文學政事。圖形凌煙。而爲唐代名臣。較之同時孔司業之經術。杜萊公之政業。議者有未足焉。孔之與杜。然矣。較於漢之留侯。及董江都。其逆籌之良。宅心之純。或猶未能無遺憾焉。以此例之。古今人物其優劣不倫。雖更僕未能盡也。欲師古者宜取則於上上。賢者在古亦衆矣。何獨私於一家哉。魯瞻曰。先生之言侈矣。留侯之與江都。信足法歟。余曰。不然也。古之人以道德爲師者。有孔子焉。有孟氏焉。以政業居輔弼者。有伊尹焉。有周公焉。人而不爲孔孟伊周。其學皆苟焉而已。子將復古必如斯而後可爾。魯瞻曰。敢問復之之功奚先。余曰。載籍之存者。莫古於易。伏羲之卦。文王之象。周公之爻。孔子之繫。於是乎悉備。姑摘一二陳之。風自火出。家人。君子以言有物而行有恆。此身正而家齊之象也。洊雷。震。君子以恐懼修省。此自治之象也。山附於地。剝。上以厚下安宅。此安養人民之象也。雷電皆至。豐。君子以折獄致刑。此聽訟之象也。自此而推。一卦一爻。皆開物成務之道也。魯瞻父子夙夜究心於斯。此則所謂眞復古者。過則聖不及則賢。達則兼善於人。窮則獨善諸己。復古之功。不亦大哉。若曰沾沾

焉取則於一家。不幾於自隘矣乎。請以是記諸屋壁。魯瞻毋以余言爲誇而棄之。元佐名某以經學教授於鄉。言行有師法。魯瞻學有端緒。自給事中遷今官。正氣蓋凜然云。

敦睦堂記

台黃巖之西三十里有澧水。澧水之上大姓張氏居焉。故有堂曰樂善。至諱遂者。屬其子光祖與璣爲歲時合族之所。諸孫若奎等五人謹守之而不敢廢。元至正壬辰堂燬於盜。嘗欲作之而未能。越二十六年爲國朝洪武丁巳。若奎之子昭與羣從兄弟謀以爲自斯堂之廢久而不復。則親義疎而友悌乖。將始諸此。可不亟圖。乃各出錢粟材木金石之費。合作同謀。弗怠弗忘。如營其私。越明年堂成。旣行會族之禮。復更其名曰敦睦。其在京師者太學生昇。遂來徵余記。昔者先王盛時。制民之具旣備。又爲井田以聯其心。爲鄉黨州閭以同其俗。爲學校以化其暴戾。而樂其善良。又有月書歲考之法。以糾其不率教者。而取人之際。又必察其孝弟。嫺睦之行焉。故當是時。凡比屋鄰井之人。喜相慶。戚相弔。疾病患難相調卹。如至親然。脫有災禍非常之事。狠虐不軌之人。皆無所自而發。發則親戚鄰保隨而撲滅之。故其時天下無亂民。以百姓皆相親睦故也。世遠法墮。人自爲家。鄉自爲俗。甚者兄弟父子不通假貸。憂喜不相問。逸樂不同情。事觸於中。則勃然操戈而相逐。父不能以禁其子。弟不能以諍其兄。往昔之亂多起於此。非民性異於古也。制民之具不若耳。制民之事非無位者所得爲。有志之士能睦其族化其鄉。而不陷於非義。豈非善學古者乎。若張氏之爲。蓋近之矣。賢人君子。豈必皆假乎位而後行道。居乎家而使同姓之親。少長知禮。

讓而不爭。壯者知勉於學而篤於行。頑嚚化爲純慤。愚昧者不失其性。是亦道之推也。豈細事哉。張氏之孫多賢能。其鄉咸稱之。他日海東之邑。聞有民淳俗厚如鄒魯者。必張氏之化也歟。試記其堂以俟焉。

棣華堂記

盱江黃氏有昆弟之賢者三人。曰松軒。曰竹所。曰梅庭。松軒嗜學善屬文。而於法律家尤深。訓三子皆爲儒。遂以子貴。追贈泰和州判官。竹所好談辨。出史入經。霏霏若吐玉屑。人爭樂聽之。梅庭獨淬礪力戰。集有力少年。陰授之擊刺。坐作進退之法。且曰。不久兵將起。吾以衛吾宗也。松軒旣沒。四方果大亂。江右受禍尤慘。死喪相枕藉。孰不畏之。梅庭同竹所聚兵爲屏蔽。卒獲無虞。及今四海平定。而二君子且歸然老矣。龐眉皓髮。相映於殘山剩水之間。自相謂曰。同氣而生者三人。伯兄墓木已拱。所存者唯吾與兄耳。春花秋月。可不隨時而作樂乎。於是日具籩豆。飲酒以爲歡。人見其雍雍然和怡怡然悅。似不可以幾及。取詩中常棣之語。名其堂曰棣華。松軒之子子邕。請予記之。夫常棣之詩。召公所作。以親夫人之兄弟者也。故首章有云。常棣之華。鄂不韡韡。凡今之人。莫如兄弟。箋者謂鄂足傳華之光明。則韡韡然盛興者。喻弟以敬事兄。兄以榮覆弟。恩義之顯。亦韡韡然。二君子生於簪紳之家。漸濡詩書之澤。兄弟之間。下承上覆。彰明光顯。固無失於詩人之旨。然而兵戈之際。各攜其妻孥。西東竄奔。視兄弟如棄涕唾。而二君子乃如形影相戀。不使跬步之睽違。則二章所謂死喪之威。兄弟孔懷者。得不爲有合乎。及至喪亂旣平之後。從容燕飲。以洽其和孺之情。朝斯夕斯。唯恐不足。則六章所謂儗爾籩豆。飲酒之飫者。又不爲尤有合乎。常

棣之詩。何其多與二君子類也。蓋兄弟之情本乎秉彝。無古無今。同一至理。雖去之二千餘載。固當無甚相遠也。名其室以棣華。誰曰不宜。抑予聞世之人有以桂名軒者矣。有以椿名室者矣。徒欲歆豔乎科目之榮。企望乎耆碩之年耳。其於飭勵之益。則蔑乎未之有聞也。二君子名堂之義。誠可爲不令兄弟之勸。厚人倫。美教化。移風俗之道。將於是乎在。子邕位躋法從爲時名臣。而其伯仲又多能文辭。子邕幸相率發爲聲詩。勒成簡編。如唐之李父華萼集故事。二君子升堂獻酬之際。時出一二章歌以侑觴。人之聞其詩者。甯不油然而興起矣乎。不知子邕又以爲何如也。

貞白堂記

臨川許君仲孚闢貞白堂一所。與環翠亭相映接。蓋爲讀書地也。間來徵予記。余聞仲孚清修而嗜學。堂下種梅花數樹。當霜雪嚴沍之際。衆芳搖落。而是花獨翹然散而爲春妍。冰玉其葩。一塵不縈。仲孚歎曰。其所謂貞白者。非子也耶。乃約二三勝友。日吟哦其下。超然神遊。如升天際。恍不知貞白之在己耶。抑果梅之有貞白耶。客有歌之者曰。遊氛冉冉兮將汙人。曠獨處兮誰與鄰。姑射仙人兮玉爲神。瞻青鸞兮服素裙。望之不見兮隔河津。青鳥不徠兮會無因。仲孚從而廣之曰。天風翛翛兮生翠寒。白月流光照松壇。美人徠兮佩珊瑚。殷勤遺我青琅玕。我將擣之奉晨餐。歌已。二人相視而笑。予家芙蓉山之陽。懸崖萬丈。蒼官青士。日駢立乎其間。方滴露研硃。入朝眞洞點易。聞仲孚之事。不覺矍然而歎曰。我等其有激而然耶。雖然。物我之立。皆成於相形。而泯於相忘。非貞則無有偏也。非汙則無有白也。予嘗觀心。皦如明鏡中。

懸萬象自見求其貞白且不可得況假物之云哉況乎天地中萬彙芸芸自形自色杳不知其故雖造物者隨氣運行色色形形亦若不知其故是果孰爲之樞紐乎問諸兩間兩間不言叩之百物百物不言質諸神局則曰是在我矣斯貞白之義已仲孚曰子玄言也不知者謂涉於虛無恍惚殆非也請記諸壁何如於是乎書

永思堂記

永之爲言長也所謂永思者長思而不忘也長思而不忘者爲誰福清林榮得仁也得仁十歲喪父泊長以縣諸生貢上太學選入禁庭爲承勅郎謙慎而齊飭聲譽出薦紳間會濂朝京師乃來請曰榮也念父不見或食焉或羹焉或寢且息焉恆懸懸有思思之不得則升高遠望草木之敷腴山川之鬱紆萬物欣欣有自得意輒泫然流涕曰光景日新吾父獨何之乎將乘海鶴遠遊三山乎抑精神流衍於氣化中冥茫而莫之覩乎何爲使我心憂而弗釋也如此者久之因以永思題諸堂楣以志無窮之悲先生願爲記之濂曰不然也子之父固亡子幸有母夫人存承候顏色問衣燠寒而進退之弄雖其側以悅之依依愛戀如羊之跪乳烏之反哺其樂將無涯視五鼎萬鍾若不能過之子何乃自苦日慘然以悲父固常思也思或鬱陶成疾獨不計貽母之憂乎得仁曰堪輿之間當其青年父母俱存者何限雖閭閻小夫亦知割鮮具醪醴稱曰具慶榮始二十又七獨與母居如之何勿思吾父生我之劬勞欲報之德所謂昊天罔極者也一乘馭則思爲其執鞭一就寢則思爲其扇枕一有疾則思爲其嘗藥今皆不可得已觸目之間無

非可感。如之何勿思。濂曰：不然也。人心苦不知足。得隴且望蜀。濂也。父母皆歿久矣。其分當永思乎。雖曰偏侍。不獨愈於濂乎。爲子謀者。當思盡孝以養母。致思貴富以顯父。使人稱之曰：某氏之子。斯爲永思也。已得仁曰。非此之謂也。盡孝養母。榮豈不知之。奚俟先生之言。若曰：致思於富貴。富累於千金。貴爲三事大夫。縱可以慰母心。而吾父不知享焉。終有不愜吾情者。事不得其全故也。如之何勿思。濂曰：子之言美矣善矣。而又有一說。願爲子陳之。夫爲孝子者。不當爲無益之思。而思不死其親可也。其謂不死者何。子於事君之際。則必自思曰：此當罄厥忠。不可溺於邪佞。恐辱吾父也。能思是。子之父雖死。其不死矣乎。蒞官之時。則必自思曰：此當廉且勤。不可習於貪怠。恐辱吾父也。能思是。子之父雖死。其不死矣乎。鞠獄之頃。則必自思曰：此當欽且恤。不可務於苛刻。恐辱吾父也。能思是。子之父雖死。其不死矣乎。交友之中。則必自思曰：此當主於信。不可待以浮僞。恐辱吾父也。能思是。子之父雖死。其不死矣乎。出言之間。則必自思曰：此當合於正。不可流於詖遁。恐辱吾父也。能思是。子之父雖死。其不死矣乎。觸類而長之。如此可思者甚衆。雖更僕不能盡也。子能力行之。方可盡永思之道也。於子何如。榮復泫然流涕曰：斯言也。榮未之前聞也。敢不夙夜祇奉。濂既退。嘉得仁之能孝也。因次第問答之語。記諸堂壁云。

貞則堂記

貞則堂者。傅君藻養母夫人之所也。夫人姓樓氏。故爲烏傷士族。年十五歸同里處士壽朋。生二子。長曰權。次卽藻。又十有八年而寡。夫人斷髮誓不食他姓。家日單。凍餒交攻。當風雪淒迷。青鐙夜織。雞再號。猶

輶輶開機杼聲。人弗能堪。夫人裕如也。越若干年。始克葬處士君華川之南。葬已。先廬未備者補之。持宿券責金者庚之。專心一力。訓二子有成。權得推擇爲吏。藻從黃文獻公遊。以文辭稱。夫人素髮垂領。日坐堂上。含冲挹腴。而享盡養之樂。時年蓋六十餘矣。人皆曰。女婦青年能守貞者非艱。守於阨危中者爲艱。當夫人獨居。室無儔石之積。皦皦自信。如荆南之金。色百鍊而弗變。非其賢過人能如是乎。吾邦生齒之繁。動至數十萬。求如夫人者。千或不能二三。宜其休聞流溢無窮。所可憾者。無良有司上於朝廷。以表其宅里爾。金華宋濂獨不謂然。何者。娶爲呂成公講道之邦。禮義修明。風俗淳美。非惟家孝弟而人書詩。至於女子婦人亦皆無思犯禮而畏行露之侵。第處道之常。同老於室。無以見其所執之操。今謂如夫人者。千不能二三。是何待父母之國如此其輕也。向使處士君不蚤逝。孰知夫人之行能卓卓如是乎。利器之施。遇錯節而顯。勁栢之剛。因凝霜而知。名蓋生於世之變也。計夫人之心。豈樂負守貞之名哉。以守貞名。夫人已爲不幸。况又欲徼旌寵之榮乎。旌寵朝廷之事也。濂也不敏。與藻居同郡。學同師。嘗升斯堂而拜夫人。藻指謂濂曰。吾子幸爲我文之。濂不敢讓之。文傳。夫人大節其亦烜著於世矣乎。

貞節堂記

天地之間有大經。決不可廢者。猶如闔廬以爲居。稻粱以爲食。絳布以爲服。一日無之。則人事盡失。難以爲治。此其故何哉。苟無闔廬。則風雨震凌矣。苟無稻粱。則道殣相望矣。苟無絳布。則手足皸瘃矣。三者猶難闕一。而況於大經乎。大經者何。三綱之謂也。是故臣有貳心者爲不忠。子悖其父者爲不孝。婦事二夫。

者爲失節。彝倫攸斁。職此之由。其所係於人道之重者何如哉。泉南莊氏婦。其夫爲海鹽陳思恭。思恭海賈也。育子寶生。四月去入海。五年而不返。或以爲死。誘莊改適。莊心如鐵。不爲動。已而思恭歸。相見之頃。悲喜交集。居久之。思恭復去航海。卒溺焉。向日誘者譁曰。今真死矣。奈何。莊指寶生曰。夫雖死。而子存。猶不死也。吾敢死其夫而去之乎。誘者又曰。子賢也。猶云可也。脫有不肖。餘生將託之東流乎。莊曰。此天也。吾無所逃也。順受之而不失也。此其一念之正。可以貫金石。可以通神明。可以耀古今。嗚呼。孰謂天道無知。天道儻無知。而寶生何其能賢耶。此人定勝天之義著矣。嗚呼。使以莊此心推之。子必善事其親。而稱孝矣。臣必能報其上。而稱忠矣。四海其有不治乎。奈何。世降俗漓。號爲士大夫。鬚鬢如戟。議論凌雲霄。一則曰我丈夫也。二則曰我男子也。或遇君父有難。作狐鼠竄去。往往而是。以婦人女子之不若。抑又何說哉。嗚呼。柏舟之詩。不作久矣。余於婦莊。甯不若聞空谷楚音乎。然而君子之立志。甯暴露而無庇也。甯凍餓而殞其生也。天地之大經。不可失也。予故於莊之事。亟稱道而弗置者。爲其有合於此也。寶生介吾友黃彝先生請記。所謂貞節堂者。寶生其誠賢矣哉。因書此授之。思恭死時。莊年三十七。今踰五十矣。初思恭嘗娶妻生一子。貧寓外家。莊遺錢使營生產。且償思恭之宿逋。此固人之所難。以非大節所繫。不詳書之。

經畬堂記

聖人之言曰。經。其言雖不皆出於聖賢。而爲聖人所取者。亦曰經。經者。天下之常道也。大之統天地之理。

通陰陽之故。辨性命之原。序君臣上下內外之等。微之鬼神之情狀。氣運之始終。顯之政教之先後。民物之盛衰。飲食衣服器用之節。冠昏朝享奉先送死之儀。外之鳥獸草木纖微之名。無不畢載。而其指歸皆不違戾於道。而可行於後世。是以謂之經。易書春秋用其全。詩與禮擇其純而去其僞。未有不合乎道而可行於世者也。故易書詩春秋禮皆曰經。五經之外。論語爲聖人之言。孟子以大賢明聖人之道。謂之經亦宜。其他諸子所著。正不勝誦。醇不迨疵。烏足以爲經哉。自漢以降。聖賢不作。異說滋橫。凡外雜術小道以及星歷地理。占卜醫藥。種樹養馬。詭誕淺近之言。皆僭以經名。千餘年間。時益歲加。書之以經名者。布乎四海之內。學者眩於其名。趨而陷溺焉者甚衆。而五經孔孟之道晦矣。然非彼之過也。學五經孔孟者。不能明其道。見諸事功故也。夫五經孔孟之言。唐虞三代治天下之成效存焉。其君堯舜禹湯文武。其臣臯夔益契伊傅周公。其具道德仁義禮樂封建井田。小用之則小治。大施之則大治。豈止浮辭而已乎。世儒不之察。顧切切然剽攘萃僣其辭爲文章。以取名譽於世。雖韓退之之賢。誨勉其子。亦有經訓菑畲之說。其意以爲經訓足爲文章之本而已。不亦陋於學經矣乎。學經而止爲文章之美。亦何用於經乎。以文章視諸經。宜乎陷溺於彼者之衆也。吾所謂學經者。上可以爲聖。次可以爲賢。以臨大政則斷。以處富貴則固。以行貧賤則樂。以居患難則安。窮足以爲來世法。達足以爲生民準。豈特學其文章而已乎。錢唐錢鈞質甚敏。好學甚篤。取退之經畝之言。名其齋。會余過其郡。造旅邸。徵文甚力。余美其志。恐其泥於退之言也。推其道以告之。使求夫大者焉。

盧龍清隱記

盧龍山在京城西北二十五里。周遍十二里。高三十六丈。山嶺綿延。遠接石頭。乃江上之關塞。比於北地。盧龍山因名。和陽尊師。略月溪隱居其中。自號曰盧龍清隱。請予友王儀曹本道徵予文以記之。本道述月溪之言曰。古人有云。心不瀾濁。謂之清。迹不章顯。謂之隱。予學老子之法者也。朝暮黃梁一盂。苜蓿一盤。既適而且安。閒披鶴氅衣。手執黃庭經一卷。翛然而凝坐。九衢十二陌之遊塵。莫我之干也。甯非清邪。名氏不落於聲利之場。心迹不屬乎榮辱之境。其入也。煙霞與之同棲。其出也。漁樵與之爭席。甯非隱邪。然而老氏之道。清淨而無爲。隱約以無名。不以清爲清。不以名爲名。是則無所不名。可以治國。可以觀兵。可以修身。可以延齡。其小靡不該。其大無不并。此其爲清隱益大矣。吾嘗聞之於師而未之能行也。姑就其近似者而究心焉。雖然。予視古今不翅一旦暮。何爲復膠膠於斯。人身至中。其體含虛。不縱不橫。非東非西。纖如黍珠。鴻包元區。火龍因之而飛。饒水虎以之而生。腴庶幾騰神紫府。吹簫元都。此殆忘清隱之名。而食其實也邪。其言若是。先生以爲何如。金華宋濂聞之。歎曰。月溪蓋幾於知道者。非歟。其始也將欲遁世。其中也。又知其道可以治世。其末也。又思長生而度世。縱予有所言。其何以加於三者之間哉。於是偕本道訪月溪於盧龍山中。白月獨照。萬樹僵立。無風。乃握手歌曰。盧龍之山。今高巘岼。有儒一生。今煉九還。夜半月出。今露浸寥壇。紫霞仙人。今駕采鸞。七星爲衣。今芙蓉爲冠。鐵笛一聲。煙漫漫。擷靈芝。今下空山。歌已。三人者相視而笑。遂次第其言而爲之記。

金華張氏先祠記

金華縣東行四十五里。有地曰荅唐。山川相繆。而風氣鬱盤。著姓張氏世居其中。初張氏有諱隆府君者。字亨仲。宋建炎初。自睦而來。爲潘氏之贅壻。至今其村聚猶仍潘爲名。府君旣占名數於縣。日以力本爲務。未幾家寢穰。生三丈夫子。曰子政。曰子中。曰子成。皆能紹前業而無爽德。子中之子文華。倜儻尙奇行。鄉先達端明殿學士王公堃甚器重之。淳祐末。公遷沿江制置使。欲辟爲之屬。辭弗赴。自時厥後。府君之三子遺胤日滋。遂成三大族。亡慮十百餘人。其出而仕者。旣以文墨論議著稱於時。而退修於家者。亦循循雅飭。無愧於士君子之行。蓋自府君至是。亦十有一世矣。府君之六世孫榮。今爲一宗之長。乃慨然歎曰。吾儕承藉其先社。以克至於今日。有闔廬以禦風雨。有絲枲膏粱以爲之羞服。而先祖妥靈之無其所。不亦愼乎。於是與族弟琰力謀之。而子姓之中若留鎮琮侶四人。卽捐所居之聽事三楹。間以爲之倡。榮遂加以塹茨之功。繚以垣墉。列以龕櫝。與夫祭饗百須之器。莫不精且良。中奉府君。原其初遷也。旁以三子侑食。三族之所宗也。而又益之以制屬君。府君之流光及是始振。示不敢忘也。然而世遠屬疏。祭不敢用四仲。唯據朱徽公所定祀先祖之儀。以立春生物之始。陳器具饌而行三獻禮。月旦十五日之序。參族人散處乎東西。度不能以皆至。唯正月朔旦。無小無大咸拜於祠下。復會拜別室。以敘長幼焉。其生子已命名者。續書之於譜圖而後退。若夫朝夕汛掃啓閉之職。擇謹愿者爲之主。守祭田若干畝。則俾三族之嗣人輪掌其租入。以供孝祀燕私之事。此其大凡也。始事於至正乙巳之冬。而迄功於丙午之春。榮帥宗

人數千指皆沐浴盛冠衣入奉明薦牲酒潔清執事儼恪周旋進退濟濟跼跼觀者咸悅以爲一邑之所未觀竣事復遣其孫愈來徵濂文刻示後裔俾世世無有所易其田之鄉落步畝則附見於石陰濂聞之先王制爲廟祭之禮上下隆殺皆有常典牲牢器幣皆有常數固非士庶人可得而行然其親親之仁出於物則民彝之懿者初不以賤與貴而有異也今榮乃能於服殺宗遷之後以義起禮而遠祀府君非惟使子若孫不忘其所自出而管攝人心聚合宗族之意實於是乎在不亦孝子仁人之用心也哉嗚呼人非空桑而生孰不本之於祖者方其封殖自厚長慮却顧無所不用其極問其所從來則曰吾不知也問其薦奠之禮則又曰我未之能行也所謂報本反始之道顧當是邪視榮之爲殆將媿死矣是不可以不書三族之嗣人尙思是續是承棟宇之必葺也毋使之震凌黍稷之必穫也毋使之穢荒牲牷之必膳也毋使之瘵蠹庶幾濂之文爲不徒作矣嗚呼其懋敬之哉其懋敬之哉

國清林氏重建先祠堂記

莆田縣東二十里有山曰穀城岡巒秀拔林樾蒼潤其下匯爲巨浸號國清湖在昔盛時一望杳渺無際而波濤吞吐於風日雲月之間眞勝絕之境也唐忠臣邵州刺史林蘊之裔大理評事元始自長城徙居湖上五傳爲睦菴府君格以積慶力本造家又再傳爲承奉郎國鈞其族寔大承奉府君於艾軒文節公光朝爲諸父行迺建義齋於東井命艾軒爲之師倡明道德性命之旨遐邇生徒雲赴川臻惟恐或後東井之學遂聞於天下林氏子若孫亦世擢進士第克守詩禮之訓彌久而彌光其先祠舊在浣錦社蓋以

陸菴爲之宗。陸菴三子。長曰諱錫府君。名鼻頭房。次曰諱旃府君。名追遠房。次曰諱遷府君。名白沙房。至今垂十五世二百人之多。皆三房之後也。於是列爲神板者五。高四尺。博一尺有八寸。下設跌座。用粉塗而玄書之。其板中起於大理之祖考。逮陸菴三子而止。左右則追遠。西則白沙。東則鼻頭。凡三房之後其物故者。輒升名其間。當日南至。羣族相率合祭。其小宗有事於四世。別各行之於家。歲旦則展謁。舉序拜之禮。若冠若婚若宦學出入。悉於此而告焉。諱遷府君九世孫比部主事衡。患祠之規制庳狹。不足以交神明。乃與從子厚謀。共白於宗長伯濟而改圖之。卽大理故宅之基建屋三楹間。敞以外門。俾族之賢者司其啓閉。經始於元至正戊戌冬十二月壬寅。訖功於皇朝洪武庚戌冬十二月己酉。羣族皆出泉布來助。而曰曾恕曰寶曰天禧者爲多。相地計功。終始其役。則維卿之力也。初。陸菴在宋時已置祭田。自後累增至二千畝有奇。故烝嘗之禮。視他族爲特豐。元季亂離。始不能以自守。衡懼族散宗堙。無所繫屬。旣汲汲先祠之建。復徵濂文以昭示於後。嗚呼。先王之時。立宗法以統其屬。定廟制以嚴其分。制有隆殺。毫髮之莫踰。宗有大小。條序之不紊。所以維持人心。匡扶治道者。其事至詳且密也。迨乎後世。經殘教弛。漫焉而弗之講。曾未四三傳已。藐若秦越之相視。當是時也。有能以義起禮。因祀事而崇孝敬。雖於古昔未能盡合。甯不爲君子之所取乎。此濂於衡之請。不敢固辭。而亟稱之也。濂聞莆陽多名族。冠衣濟濟。讀書之聲相聞。貴名檢而賤浮侈。以此見艾軒之教。浹人之深。而承奉府君建學之功。及今猶未泯泯。孰謂賢者之澤不悠且長哉。詩曰。高山仰止。景行行止。三房之嗣人。尙思勗焉可也。衡字士衡。通經而有文。爲名進

士云。

平陽林氏祠學記

禮之由生、非天作而地設、制之者人也。太古無事之時、固未有所謂禮。禮之立、起於人情之變、人情之變、如洪水之潰、制禮者猶禹治水然。左淪而右疏、排險而導下、惟適水之性、使各順其道而已。不可以一法拘也。水勢有古今之殊、苟執禹之遺法、而治千載以下之水、則不合者多矣。奚可乎哉。傳曰、三王不同禮、言禮因時而變也。古者墓無祠、庶人惟祭其禰、禮也。至漢嘗祠墓矣、祭嘗及高祖矣、不可謂之非禮也。今平陽蓋竹之林氏、立祠於其始遷之祖之墓而祭之、烏得謂之非禮乎。時不同禮亦不同、禮雖不同、而因人情而立教者、未嘗不同也。初林氏之居蓋竹、自名箴者始。箴卒、葬於華蓋山。子孫至今數百家、散處鄉閭、服微情弛者久矣。其十二世孫元陽江縣尹瀆、懼其愈遠而不知所自出也、欲立祠於墓而未果。瀆卒、其子今刑部主事陞遂作祠、奉箴之主、朔望必謁、歲時必祭、皆率一族之人以從事。祠後爲齋曰思孝、以會其族人、復立祠於左偏、祀晦菴朱子之像、以其先宋吏部侍郎拱辰、知信州遷之、知南劍州起鼂、及其父陽江君配祀。卽祠之前爲學、聘鄉人之賢者爲師、使族人子弟就學焉。凡其所爲、未必皆合於古、而余獨有取者、以其得禮之意也。禮之目以千百數、求其意不過禁邪止慝、道人以善而已。人情之變也、無禮以治之、雖日刑千人而不足、教之以禮、可以使之立化於俎豆間。豈刑罰之威不若俎豆哉。制之以其所畏、不若因其所易知而教之、之爲速也。夫以旣遠久疎之族、有貧富弱強之殊、苟提其耳、授以法令、使

無相乖背。必有不可止者。今也立一祠於始遷祖之墓。率族人以祭。疎者可以復親。遠者可以不散。富強者必不敢以是私其身。而貧弱者必有所仰濟矣。其族甯有壞乎。況於有學以爲之教。有先賢之祠以爲之則。其爲族人慮者可謂備矣。林氏之嗣人祭於祠。學於學。而能修其身。睦其親者。善爲人後者也。苟不能過於他族之人。豈不負陞之望哉。陞字若高。敏事有才能。故其所爲能合於禮。其徵記於余也。遂推其意使歸而刻焉。

先夫人木像記

先夫人既歿之九年。予妻賈專朝夕思之不少置。間告予曰。妾生二十二年而歸君。妾之姑已四十有九歲。妾母方氏亦五十有四歲。後君念妾之母老。而兄弟多故。乃迎養於家。當是時。二老人蒼顏白髮。共坐堂上。妾與君沽酒買魚以奉其歡。更闌燭盡。猶連觴引滿。而語笑聲不休。君時嘗語妾曰。吾雖貧而老親之歡如此。吾退而安寢矣。後十三年而妾之姑竟亡。初姑未亡時。妾子瓚始十三歲。姑嘗撫瓚頂謂曰。吾年耄矣。或幸見汝之有子。吾死亦瞑目也。又三年。君自金華遷浦陽。妾與母從之來。今妾母七十有五歲。瓚亦娶婦生子。而妾姑之墓木拱矣。思欲如昔時共君奉觴上壽。其又可得邪。每念及此。輒涕泗交頤。然恨無以自慰也。欲刻木爲像以事之。凡遇疏食菜羹。必祭。使死者而有知。亦當翩然而來享也。雖然。此豈妾之敢知哉。不過盡其心焉爾矣。予謂之曰。昔之孝子有丁蘭者。事母至孝。及母亡而思之不置。乃刻木事之。此蓋丈夫子之事。子以一女婦能行之。亦可謂賢矣。雖然。不必爾也。古者既葬而反。虞祭主用桑。期

年而練。祭練主用栗。所謂主者。主乎神者也。設主之外。無有刻像事之者也。予之思親。豈不尤切於子哉。禮若可爲。則予爲之也久矣。專曰是固然矣。世俗媚浮屠神者。尙飾像奉之。而況妾之姑乎。妾不若是。其心終皇皇焉。君幸有以如妾之意也。予不能拒。於是命工人刻像以遺之。并錄其問答之辭。書於像龜之北。以示子孫。先夫人姓陳氏。諱賢時。金華潛溪人。

安道堂記

自昔眞主之興。天必生異常之才。以備其一代之用。外之則有貔虎之士。奉命秉略。爲之鞭驅。僭叛。汎掃六合。內之則有夔龍之倫。立法定制。爲之謀謨。廟堂協和。黎庶近而至於摯御之屬。執事之臣。亦莫不忠厚謹飭。小心而盡職。雖曰善以類應。非天命孰能使然哉。皇上肅將明威。致虔天討。於四方江淮之間。豪傑魁壘之士。翕然附從。指顧叱咄。戰勝攻取。無不得意。及功成業定。上公徹侯。甲第相望。輔相待從。皆當時之賢。而於近侍之中。又得供奉司令杜君安道。而益知其他之皆然也。安道自上之興。持刀鐻侍左右。未嘗暫違。凡上征吳越。略淮楚。攻齊魯。汴蔡。舟車所臨。四五千里。擄僞王。斬驍將。以百十計。帷下之謀。籌策之算。安道皆得身從而目見之。安道性慎密不泄。動稱法度。爲上所信任者二十二年。由尙冠郎改御用監令。至今官入內庭。行步可數。言語敬恭。唯恐有絲毫過謬。出殿門外。要官勢人之前。如不相識。一揖之餘。不啓口而退。故上每稱侍臣之忠謹者。必以安道爲言。今夫天下之官受祿於朝者。孰非仕哉。蓋有終其身沈於下位。欲覲清光而不可得者。縱得近輦轂下。有願承一顧之恩而不可得者。安道乃得侍上。

而見稱許。雖曰慎密之所致。又豈非天哉。安道其益勉之可也。余官在太史。事上者亦二十年餘。安道既以其字名堂。復願侍予文。以識遭逢之盛。夫稱天命以紀載國家人材之美。予之職也。乃爲之言。

思遠樓記

盱江有健湖。周圍凡若干步。涵日星而盪風煙。四時之景無不宜者。大姓胡氏世居湖濱。以詩禮爲學。至吾永年人益稱其賢。以薦者起家。爲吉水幕職。遷海北鹽課司。白石倉副使。未及大用而終。其弟永實。其子原鳳、原鵬、原駒。皆號善繼。大夫士恆集其門。永年欲建樓以藏先世遺書。不幸貧志以歿。原鳳兄弟請於永實。因竭力成之。名之曰思遠。示不忘乎親也。介前進士曾君仰來徵予記。予問之曰。思遠之義何居。原鳳對曰。不幸先人卽世。一念及茲。精神遐漂。無所戾止。有時振衣升高。極目四顧。見雲煙之卷舒。星河之出沒。泫然流涕曰。吾先人果何所之。精爽或有靈。庶幾乘雲龍而一下焉。斯思遠之所以名樓也。予曰。是固然矣。而其義未盡也。原鳳又曰。今人邇矣。而遠者莫若古之人。古之人殞魄黃壚。泯然不可見其迹。其精神心術之近存者。賴遺言見於書爾。大則聖。次則哲。次則忠與孝。往往形諸載籍。一展卷間。神交冥漠。有不知千載之爲長。一日之爲短者。孳孳焉。惓惓焉。日致力於斯。庶幾契先人之所志爾。是或思遠之義乎。予曰。遠固遠矣。而未切於身也。盍更言之。原鳳於是研精覃思。大周六合。小入一髮。默然良久。忽揚眉吐氣而顧予曰。我知之矣。先生所謂遠者不在今人。亦不在古人。在吾之一身爾。吾身非突然而中有也。前之千萬年。自地闢天開。繩繩相承。以迄於吾身。後之千萬年。又自吾身。嚶嚶相續。以至於無窮。不可

以數計。不可以智推。庸非至遠者乎。吾身一有失焉。則前焉而弗能繼。後焉而弗能延。其責果安歸乎。是以君子懼其學之有爽也。惕惕然如履淵冰。恐其行之弗軌也。惴惴焉如馭六轡。此無他。遠之不可不慎也。若是何如。予乃喟然歎曰。子言今得之矣。頗符先子之所望矣。嗚呼。遠固遠矣。而甚邇也。古之人有三。太上立德。其次立功。其次立言。若而人遠者數千年。邇者亦一二十年。其人固不得而覩矣。玩其遺文。想其德業。儼然若與之周旋堂序之上。未嘗知其死也。所謂人雖死而有不死者存。此之謂歟。原鳳誠知此。則又能以遠爲邇。無難矣。永嘉之勝。亦有樓名思遠者。彼蓋慕浮屠之學。此則篤於彝倫。而有關於名教。世必有能辨之者。予與原鳳言。不過如此而止。若夫澗湖之風物。與斯樓之雄麗。賢士大夫當有爲原鳳賦咏者。予則可略也。

見山樓記

見山樓者。上虞魏君仲遠之所建也。仲遠居縣西四十里所。龍山委蛇走其南。將升而復翔其旁。支斜迤而西。則爲福祈諸峰。若車若旌。若奔馬。若渴鹿飲泉。不一而足。勢之下降爲陰阜。爲連坡。爲平林。一奮一止。復襟帶乎後先。東則遙岑隱見。青雲之端。宛類蛾眉。向羣山相嫵媚爲妍。其下有巨湖。廣袤百里。汪洋浩渺。環浸乎三方。晦明吐吞。朝夕萬變。方屏插起湖濱。曰夏蓋山。去天若尺五。巖峙谷張。尤可玩愛。誠越中勝絕之境也。仲遠心樂之。以爲非高明之居。不足延攬精華。而領納爽氣。於是構斯樓。日與賢士大夫同登。鼎俎既備。殺核維旅。壺觴更酬。吟篇疊咏。及至神酣意適。褰簾而望遠近之山。爭獻奇秀。晴容含青。

雨色擁翠。不俟招呼。儼若次第排闥而入。使人涵茹太清。空澄中素。直欲騁鸞翳鳳。招倕佺韓終。翩然被髮而下大荒。其視起滅埃氛。弗能自拔者爲何如也。俾來俾濂記之。夫自辛卯兵興。闔廬所在。往往蕩爲灰燼。狐狸晝舞。鬼磷宵發。悲風蕭然襲人。君子每爲之永慨。自非真人龍興。撥亂世而反之正。含齒戴髮之氓。孰不在枯魚之肆哉。縱有佳山日在。眉睫間。將不暇見之矣。今仲遠雍容於觀眺之際。亦曰帝力難名。而吾民恆獲遂其生爾。昔太常博士施侯。作見山閣於臨川。而荆國王文公爲記其事。且謂吾人脫於兵火。洗沐仁聖之膏澤。餘百年。而施侯始得以樓觀自娛。仲遠之去亂離。僅四三載爾。乃能抗志物表。修厥故事。如承平時。此無他。皇化神速。有非前代所可及。雍熙之治。將覓覃及於海內。是樓之作。其殆兆之先見者歟。雖欲不爲之記。不可得也。第所媿者。濂之學識繆悠。立言無精魄。難以傳遠。仲遠尙求荆國其人而爲之。庶幾樓之勝槩。與雄文雅製。同爲不朽耳。仲遠名壽延。鄧國文貞公二十四世孫。羣從子姓。皆彬彬嗜學。文章鉅公。多集其門。而仲遠尤號翹楚。且工於詩。有和平沖澹之趣。濂蓋聞之。丹崖先生云。

瑤芳樓記

瑤芳樓者。常熟虞君子賢燕居之所也。瑤芳者何。古桐琴之名。子賢以重購得之。間一撫弄。其聲琴瑟然。如出金石。如聞鸞鳳鳴。如與仙人劍客共語於千載之上。子賢樂焉。則以謂世之名樓者衆矣。高駢之迎仙。謂其訴遐情也。其失也誕。張建封之燕子。謂其興新懷也。其失也靡。韓建之齊雲。謂其凌高曄也。其失也侈。吾皆弗敢蹈其非。欲專斯樓之美者。舍斯琴也。其孰能當之。遂以瑤芳名其樓。而列圖畫於中。常風

物清朗。白月獨照。神情遐沖。覓出世外。子賢樓冠鶴髦。自函道而升。復取琴鼓一再行。久之演而爲紫琳之操。其辭曰。有堅者石。中含精矣。其白如肪。煜有瑛矣。五音繁會。鏘然而鳴矣。客有與子賢同志者。從而賡之曰。豔質兮非華。陽卉兮非奢。折秋馨兮遺所思。望美人兮天涯。歌已相視而笑。金華宋濂聞其事。喟曰。古之人好樓居者。豈欲夸靡麗而爲榮觀哉。蓋臨陰幽之室。則其情斂以摯。處陽明之居。則其情暢以舒。隨境而遷。因物而著。其亦人理之常者乎。況夫宮角之相參。羽徵之互奏。禁其忿慾之邪。宣以中蘇之正。其於學問之功。又未必爲無所助。所以先生長者。無故不去之。蓋有以也。雖然。君子蓋不物於物。不物於物。則凡紛然而來前者。皆吾性情之發舒。或懸崖邃壑。或平墅曠林。雖非層構。可以圖闢陽陰。而清風徐來。萬籟皆動。曲澗流泉。復助之爲聲勢。五音泠然。愜心而溢耳。太蘇融浹。內外無間。有不翅聽子賢之琴於茲樓之上矣。此無他。達人大觀。無地不爲樓。無聲不爲琴也。苟局滯於一室之間。適其意則有之。而蹈道則未也。有若子賢。蓋學道而有所得者。故濂敢以是說告之子賢。博雅好古。絕出流俗之上。吾友楊君廉夫。極稱其爲人。謂篤於士行而尤孝其親云。

